

দেশবন্ধু-কথা

১৯২৫

অধ্যাপক

ত্রিজিতেন্দ্রলাল বন্দ্যোপাধ্যায় এম. এ.

লিখিত ভূমিকা-সংবলিত

ওরিয়েণ্টাল সেমিনারির ভূতপূর্ব শিক্ষক

শ্রীসত্যকিঙ্গর বিশ্বাস-সম্পাদিত

Calcutta

S. C. AUDDY & CO., BOOKSELLERS & PUBLISHERS
58 & 12, WELLINGTON STREET

1925

Twelve Annas

Printed and published by F. C. Pal for Messrs. S. C. Audy & Co.
At the Wellington Printing Works
10, Haladhar Bardhan Lane, Calcutta

নিবেদন

—○—

যিনি দেশবাসীর নিকট **দেশবন্ধু** আখ্যা পাইয়াছেন, তাগে, নিষ্ঠায়, কর্মসূধনে যিনি এখনকার যুগে সকল মানুষের শ্রেষ্ঠ ছিলেন, দেশের কল্যাণের জন্য যিনি জীবনপাত করিয়া গিয়াছেন, তাহার জীবনের কতক জ্ঞাতব্য বিষয় যাহাতে অমাদিগের স্বকুমারমতি বালকবন্দ জানিতে পারে, এই উদ্দেশ্যে **দেশবন্ধু-কথা** প্রকাশিত হইল। ইহাতে সেই মহাপুরুষের উদ্দেশে বাঙালার বর্তমান সুলেখকগণের লিখিত, কিশোর-হৃদয়ের উপযুক্ত, সুন্দর সুন্দর আধ্যায়িকা ও সুলিলিত কবিতাবলী সম্মিলিত হইয়াছে। এখন এই শুন্দি পুস্তকখানি বালকগণের উপযুক্ত বিবেচিত হইলে সকল শ্রম ও অর্থব্যয় সার্থক মনে করিব।

এই পুস্তকের অধিকাংশ রচনা বঙ্গবাণী, বস্তুমতী, ভারতবর্ষ, মানসী ও মর্মবাণী, নবযুগ, অর্চনা, বিজলী, লেখা, ফোয়ারা, গল্ল-লহরী প্রভৃতি সাম্প্রাহিক ও মাসিক পত্রিকায় প্রকাশিত হইয়াছিল। ইহাদেব কর্তৃপক্ষগণের নিকট এই ঋণের জন্য আমি চিরকৃতজ্ঞতাপাশে আবন্ধ রহিলাম।

প্রসিদ্ধ সাহিত্যসেবী, প্রাতঃশ্মরণীয় অধ্যাপক শ্রীযুক্ত
জিতেন্দ্রলাল বন্দ্যোপাধ্যায়, এম. এ. মহাশয় এই পুস্তকের ভূমিকা
লিখিয়া দিয়া আমাকে উৎসাহিত ও অনুগৃহীত করিয়াছেন।

কলিকাতা,
৬৯ মির্জাপুর ষ্ট্রাট,
১লা অগ্রহায়ণ, ১৩৩২

{ শ্রীসত্যকিঙ্কৰ বিশ্বাস

ভূমিকা।

—::—

দেশবন্ধুর চরিত্র কথা যতই আলোচিত হয় ততই মঙ্গল—
কারণ তাঁহার অন্তরে যে শক্তি, মহৱ ও বিশালতা ছিল তাহা
মনুষ্য-জীবনে সাধারণতঃ দুর্ভ, যুগ-যুগান্তের পরে কঢ়ি
কোনও ক্ষণজন্মা মহাপুরুষের জীবনে তাহা পরিলক্ষিত হয়।
আমাদের মত বিজিত, পরাধীন, হত-গৌরব জাতির মধ্যে যে
সেরূপ পুরুষসিংহ উঠিতে পারেন তাহা কল্পনা করাই যেন
এক রুক্ম ধূমটুকু। কিন্তু ভগবানের কৃপায় এই অসন্তুষ্টও সন্তুষ্ট
হইয়া গেল—আমাদেরই চক্ষুর সম্মুখে চিত্তরঞ্জনের আয় একটা
বিরাট পুরুষ ভাস্তুর জোড়িদের মত বাঙালা দেশের গগন
উদ্ভাসিত করিয়া তাঙ্গদিনের মধ্যেই মিলাইয়া গেলেন। তিনি
চলিয়া গেলেন বটে, কিন্তু তাঁহার শেষ দান, তাঁহার পুণ্যস্মৃতিটুকু,
আমাদের মধ্যে রাখিয়া গেলেন, এবং সে স্মৃতির যতই আলোচনা
হয় ততই আমাদের দেশ এবং জাতির পক্ষে কল্যাণের কারণ
হইবে বলিয়া আমার বিশ্বাস।

এই ক্ষুদ্র পুস্তকখানি চিত্তরঞ্জনের জীবনী নহে। চিত্ত-
রঞ্জনের সমগ্র জীবন-চরিত লিখিবার সময় এখনও আসে নাই,
বোধ হয় তাহা লিখিবার যোগ্যতাও অন্ত লোকের আছে। কিন্তু
চিত্তরঞ্জনের বিরাট মানবতার নানাদিক ছিল। নানাদিক হইতে
নানা ভক্ত নানাভাবে তাঁহাকে দেখিয়াছিলেন এবং তাঁহার

মৃত্যুর পর অনেকেই তাঁহার স্মৃতির উদ্দেশে শ্রদ্ধার অর্ঘা অর্পণ করিয়াছিলেন। বর্তমান গ্রন্থকার সেই বিরাট অর্ঘা-স্তুপের মধ্য হইতে কয়েকটি পুস্প আহরণ করিয়া একটি সাজি তৈয়ার করিয়াছেন। আমার বিশ্বাস তাঁহার শ্রম সফল হইয়াছে। এই সঙ্কলন পুস্তকখানি বড়ই উপাদেয় ও চিত্তাকর্ষক হইয়াছে। ইহাতে দেশবন্ধুর বাল্যজীবন হইতে শেষ বয়স পর্যন্ত বহুদিনের নানা বিচিত্র কাহিনী সমাবিষ্ট হইয়াছে। সর্ববত্ত্ব বিদ্যালয়ের ছাত্র-গণের মধ্যে ইহার সমাকৃত আদর হইতে দেখিলে আমি অত্যন্ত সুখ্য হইব। গ্রন্থকারের অনুরোধে আমি বিশেষ আগ্রহের সহিত এই ক্ষুদ্র ভূমিকা লিখিয়া দিলাম।

যিনি প্রকৃত বড়লোক, কেবল গুণগান করিলে তাঁহার সম্মান করা হয় না। চারিদিক হইতে সমগ্রভাবে তাঁহাকে বুঝিতে চেষ্টা করিলেই তাঁহার যথার্থ শ্রদ্ধা করা হয়। দেশবন্ধুকেও এইরূপ ভাবে বুঝিতে চেষ্টা করিতে হইবে, তাঁহার মানবত্ব ও মহৱ্যের স্বরূপ উপলব্ধি করিতে হইবে, তবেই তাঁহার প্রতি দেশবাসীর যে বিপুল শ্রদ্ধা তাহা সম্যক বিকাশ লাভ করিবে।

১৯১৬ সাল হইতে ১৯২১ সাল পর্যন্ত রাজনৈতিক জীবনে আমি দেশবন্ধুর সহকন্সৌ ছিলাম, অত্যন্ত নিকট হইতে তাঁহাকে দেখিবার সুযোগ পাইয়াছিলাম; আমাদের কয়েক জনের একান্তিক আগ্রহে ও চেষ্টায় বোধ হয় তিনি প্রথমে ঘনিষ্ঠ ভাবে রাজনীতি-ক্ষেত্রে মিশিতে আরম্ভ করেন। তাই এই কয়েক বৎসরের আলাপে তাঁহার চরিত্রের যে বিশেষত্ব দেখিয়াছিলাম তাহার ছুই একটি কথা এখানে বলিব।

. ১৯২০ সালের মার্চ কিংবা এপ্রিল মাসে কাশীধামে নিখিল
ভারত কংগ্রেস কমিটির অধিবেশন হয়। তখনও মহাত্মার
অসহযোগ-নীতি সাধারণের মধ্যে তেমন ভাবে প্রচারিত হইতে
আরম্ভ হয় নাই। কংগ্রেস অসহযোগ-ব্রত গ্রহণ করিবেন কি
না, ইহাই এই সভার আলোচ্য বিষয় ছিল। বাঙালা দেশ
হইতে বিপিন বাবু, আমি, শ্রীযুক্ত কামিনী চন্দ প্রভৃতি কয়েকজন
এই সভায় উপস্থিত ছিলাম। দেশবন্ধু তখন ডুমরাওঁ'র রাজের
মোকদ্দমা করিতেছিলেন। তিনি আরা হইতে আসিয়া সভায়
যোগদান করেন। কংগ্রেস কমিটির অধিকাংশ সভ্য, দেশবন্ধু ও
আমরা সকলেই তখন মহাত্মার বিপক্ষে। দেশের বর্তমান অবস্থায়
অসহযোগ চলিতে পারে না ইহাই সকলের মত। লোকমান্য
তিলক এই সভায় উপস্থিত ছিলেন। তিনিও অসহযোগের ঘোর
বিপক্ষে। অধিকাংশের মতে অসহযোগ গ্রহণ করা হইবে না,
এবং ভবিষ্যতে ইহার আলোচনাও হইবে না, এইরূপ একটি
প্রস্তাব স্বীকৃত হয় হয় হইয়া উঠিল। এমন সময় দেশবন্ধু একটু
ঘূরিয়া দাঁড়াইলেন। তিনি মহাত্মার সহিত পরামর্শ করিয়া ঠিক
করিলেন যে অসহযোগ গ্রহণ করা হইবে কি না, তাহা মীমাংসা
করিবার জন্য আগষ্ট কি সেপ্টেম্বর মাসে কলিকাতায় কংগ্রেস
মহাসভার এক বিশেষ অধিবেশন হইবে এবং সেইখানেই এই
বিষয়ের চূড়ান্ত নিষ্পত্তি হইবে। ফিরিবার সময়ে মোগলসরাই
ফ্রেসনে দেশবন্ধুর সহিত আমার এই সকল বিষয় লইয়া আলাপ
হইতেছিল। আমি বলিলাম, “আপনি অসহযোগের বিপক্ষে,

কিন্তু আপনিই আজ মহাত্মার প্রস্তাব পাস করাইয়া দিলেন।”
দশ মহাশয় হাসিতে হাসিতে বলিলেন, “অসহযোগের বিরুদ্ধে
হইলেও আমার মহাত্মার উপর খুব ভক্তি, আর Mahatma
can't bear a defeat (মহাত্মা হার স্বীকার করিতে
পারেন না) ।

কথাটা মহাত্মার সম্বন্ধে খাটে কিনা জানি না, বরং দেখিতে
পাইতেছি যে মহাত্মাজী হার মানিয়া লইতে খুব প্রস্তুত, যেন
হারিতে পারিলেই খুব খুসী ; কিন্তু কথাটা চিন্তারঞ্জনের সম্বন্ধে
যে বর্ণে বর্ণে খাটে সে বিষয়ে আর সন্দেহ নাই । কোন বিষয়ে
হারিতে হইবে, তা সে মোকদ্দমাতেই হউক, আর কংগ্রেস,
কাউন্সিলের ব্যাপারেই হউক, একথা তিনি কিছুতেই সহ
করিতে পারিতেন না । হারের সন্তাবনা দেখিলেই উভপ্র ও
অসহিষ্ণু হইয়া পড়িতেন । শেষ মুহূর্ত পর্যন্ত সমগ্র শক্তি
প্রয়োগ করিয়া লড়িতেন এবং প্রায়ই দেখিতাম, হারকে জিত
করিয়া ঢাক্কিতেন । ১৯২৩ সালের কাউন্সিল-নির্বাচনের ব্যাপার
এই বিষয়ের একটি প্রকৃষ্ট উদাহরণ । কাউন্সিল চুক্তিতে
হইবে এই ঠিক করিয়া দেশবন্ধু যখন স্বরাজ্য দল গঠন
করিলেন, তখন নির্বাচনে তিনি জয়লাভ করিবেন একথা
কেহ কল্পনাতেও আনে নাই । খবরের কাগজে আঁক কষিয়া
লোকে দেখাইয়া দিল, দেশবন্ধু কিছুতেই জিতিতে পারেন
না । কিন্তু বাহির হইতে যত বাধা পাইতে লাগিলেন দেশবন্ধুর
ততই জেদ বাড়িয়া যাইতে লাগিল । হাতে টাকা নাই অথচ
নির্বাচন ব্যয়-সাপেক্ষ ব্যাপার । কিন্তু এমনিই জেদ যে

বিপুল ঋণ-ভারের উপর আবও ত্রিশ হাজার টাকা ঋণ করিয়া নির্বাচনের খরচ চালাইতে লাগিলেন। ফল কিরূপ হইল, চিত্তরঞ্জনের নেতৃত্বে স্বরাজ্য দল কাউন্সিলে কিরূপ প্রভৃতি লাভ করিল, তাহা সকলেই জানেন। কিন্তু এই সাফল্যের মূলে তাঁহার প্রবল ইচ্ছা-শক্তি, হার না মানিবার দিকে তাঁহার কঠোর সংকল্প।

২

তাঁহার হস্তয়ে একদিকে যেমন ছিল তার না মানিবার দৃঢ়-সংকল্প অন্তর্দিকে তেমনই ছিল দৃক্পাতশূন্য, বে-পরোয়া ভাব। লাভ লোকসান খতাইয়া দেখা তাঁহার কোনও কালে আসিত না। একটা কাজ ভাল যখন বুঝিয়াছেন তখন তাহা করিতেই হইবে, তা ফল যাহাই হউক না কেন। সকলেই জানেন যে বিপুল উপার্জন করা সঙ্গেও দেশবন্ধুর অনেক ঋণ ছিল। যখন তিনি ব্যারিষ্টারএর ব্যবসা ছাড়িয়া দিলেন তখনও তাঁহার অনেক লক্ষ টাকা দেন। পক্ষান্তরে তখন তাঁহার ব্যবসায়ে প্রতিপত্তির পূর্ণ জোয়ার। বৎসরে বোধ হয় পাঁচ লক্ষ টাকা উপার্জন করিতেছেন। আর দুই এক বৎসর ব্যবসা চালাইলেই বোধ হয় একেবারে ঋণ-মুক্ত হইতে পারেন। কিন্তু এই দুই এক বৎসর অপেক্ষা করা তাঁহার কোষ্ঠিতে লেখে নাই। ১৯২১ সালের জানুয়ারী মাসে অসহযোগ-ব্রত গ্রহণ করিয়া যে দিন বুঝিলেন ইংরাজের আদালতে ব্যবহারাজীব সাজিয়া দাঁড়ান অন্যায়, সেই দিনই পরিণামের দিকে দৃক্পাতমাত্র না করিয়া অগাধ উপার্জনের প্রলোভন হেলায় ত্যাগ করিয়া একেবারে রাস্তায় গিয়া

দাঢ়াইলেন। হৃদয়ের অসাধারণ ন্যাপ্তি, প্রাচুর্য না থাকিলে একুপ কেহ কথনও করিতে পারে? আর একুপ বিশালতা না থাকিলে কেহ কথনও বড় হইতে পারে?

৬

কাব্য আলোচনা করিতে করিতে তিনি অনেক সময় বলিতেন “রবিবাবুর কবিতায় প্রাণের আবেগ (passion) নাই, ইহাই উহার প্রধান দোষ।” কথাটা বোধ হয় ঠিক নয়, অন্ততঃ ইহা লইয়া তাঁহার সহিত আমার অনেক তর্ক হইত। কিন্তু তিনি কেন একথা বলিতেন তাহা কতকটা ধরিতে পারি। তাঁহার প্রকৃতি এমনই আবেগময় ছিল যে, সে আবেগের তুলা-রূপ প্রকাশ তিনি সচরাচর কবিতায় বা সাহিত্যে দেখিতে পাইতেন না। কাজেই বর্তমান যুগের বাঙালা কবিতা তাঁহার কাছে passionless (ফিকে) বলিয়া বোধ হইত। তিনি প্রাণের প্রকৃত শান্তি, চিন্তের পরম সুখ পাইতেন বাঙালার বৈষ্ণব কবিতায়।

৮

ব্যারিষ্টারী ব্যবসাতেও চিন্তরঞ্জনের একটা বড় বৈশিষ্ট ছিল। শুরু আইন জ্ঞানে তাঁহার অপেক্ষা বড় ব্যারিষ্টার বা উকিল কলিকাতা হাইকোর্টে অনেক ছিল, এখনও হয়ত আছে। কিন্তু এমন অসামান্য একাগ্রতা, মক্কলের কাজকে এমন একেবারে নিজের কাজ বলিয়া জানা আর কাহারও দেখিয়াছি বলিয়া মনে হয় না। মোকদ্দমায় মন বসিয়া গেলে তিনি যেন

ভূতবিষ্টের মত খাটিতেন, তা সে টাকা পান আর নাই পান
বাস্তুবিক যে সকল মোকদ্দমায় তাহার অসাধারণ শক্তিমন্তা ও
কৃতিত্ব প্রকাশ পাইয়াছিল, তাহার জন্য তিনি অতি সামান্য টাকাই
পাইয়াছিলেন। শ্রীযুক্ত অরবিন্দ ঘোষের মোকদ্দমাই তাহার
পসারের প্রধান ভিত্তি, কিন্তু এই মোকদ্দমা চালাইবার সময়
তাহাকে ধার করিয়া সংসার-ধরচ চালাইতে হইয়াছিল। পুস্তকের
মধ্যে অমৃতবাজার পত্রিকার মামলার উল্লেখ আছে—সে
মোকদ্দমার জন্য তিনি এক পয়সাও পান নাই। অরবিন্দের
মোকদ্দমার তিনি ৮ দিন সওয়াল-জবাব করিয়াছিলেন, যাহারা সে
বক্তৃতা শুনিয়াছিল তাহাদের কাণে এখনও যেন উহা বাজিতেছে।
এমন স্থুলভিত্তি তাথচ এমন আবেগময় বক্তৃতা ভারতবর্ষের কোনও
বিচারালয়ে যে কথনও হয় নাই একগা নিঃসন্দেহে বলিতে পারি।

এই সামান্য ভূমিকায় আর কোন কথা বলা চলে না।
আমার বোধ হয় প্রাণের বিশালতাই ছিল চিন্তরঞ্জনের প্রধান
গুণ। এই গুণেই তিনি সকলের উপর মাথা তুলিয়া দাঁড়াইতে
পারিয়াছিলেন। এই গুণেই তিনি এমন ভাবে লোকের চিন্ত
আকর্মণ করিয়া বাঙালি দেশের বুক জুড়িয়া বসিতে পারিয়া-
ছিলেন। এই বিশালতার নামা উদাহরণ, পাঠকগণ বর্তমান
পুস্তকে পাইবেন। আশা করি, তাহার আলোচনা তাহাদের
পক্ষে মঙ্গলপ্রদ হইবে।

বিদ্যাসাগর কলেজ,

কলিকাতা

১৩শে কান্তিক, ১৩৩২

} শ্রীজিতেন্দ্রলাল বন্দ্যোপাধ্যায়

সূচী

(গদ্যাংশ)

বিষয়	পৃষ্ঠা
প্রথম পরিচেদ	
জীবন-কথা
	...
	...
	১
দ্বিতীয় পরিচেদ	
জীবন-কথা
	...
	...
	১৪
তৃতীয় পরিচেদ	
মাতাপিতার প্রতি ভক্তি
	...
	...
	২০
চতুর্থ পরিচেদ	
দয়া ও দান
	...
	...
	২৩
পঞ্চম পরিচেদ	
একাগ্রতা
	...
	...
	৪৩
ষষ্ঠ পরিচেদ	
উৎসাহ ও একাগ্রতা
	...
	...
	৪৫
সপ্তম পরিচেদ	
ত্যাগ ও অনাসক্তি
	...
	...
	৪৭
অষ্টম পরিচেদ	
'উদারতা ও ভালবাসা
	...
	...
	৫২
নবম পরিচেদ	
সংযম-অভ্যাস
	...
	...
	৫৫



কলিকাতার প্রথম মেয়ের

দেশবন্ধু-কথা

প্রথম পরিচেদ

জীবন-কথা

সর্বতাগী সন্নাসী চিত্তরঞ্জনের রাজনীতিক জীবনের অনেক কথাটি বর্তমান সময়ের পাঠকের জানা আছে এবং সে সম্পর্কে তাঁর সহিত যাঁহারা বিশেষভাবে সংশ্লিষ্ট ছিলেন তাঁহারাই আলোচনা করিতেছেন ও করিবেন। আমি কেবল তাঁহার জীবনের অপর দিক লইয়া দুইএকটী কথা বলিব।

পল্লীগ্রামে আমার জন্ম ; শিশুকালে আমি পল্লীগ্রামেই থাকিতাম এবং পল্লীগ্রামস্থ বাংলা স্কুলে পড়িতাম। ভবানীপুরের সহিত কোন সম্পর্ক ছিল না, স্কুলে চিত্তরঞ্জনের শিশুকালের কথা কিছুই বলিতে পারিব না। ইংরাজী পড়িতে ভবানীপুরের লঙ্ঘন মিশনরী স্কুলে আসিয়া চিত্তরঞ্জনের সহিত আমার প্রথম পরিচয়। সেও অবশ্য খুব বাল্যকালের কথা। আমি যখন বোধ হয় উক্ত স্কুলে চতুর্থ মাস অর্থাৎ এখনকার ষষ্ঠ শ্রেণীতে পড়ি, তখন চিত্তরঞ্জন প্রথম আসিয়া এই স্কুলে ভর্তি হন। তিনি আমার ঠিক নীচের কাসেই ভর্তি হন।

লঙ্গন মিশনরী স্কুল সাধারণতঃ দরিদ্র বালকদিগের স্কুল। বড়লোকের ছেলে হইলেও অতি অল্পদিনের মধ্যেই চিন্তরঞ্জনের কোমল স্বত্ত্বাব ও সরল ব্যবহার ক্লাসের সকল ঢাকেই মুক্ষ করে। স্কুলে নবাগত বালকটির স্নিফোজ্জ্বল সৌম্য মুখখানি দেখিয়া আমারও তাহার সহিত আলাপ করিতে ইচ্ছা হয়। আমি ভিন্ন-ক্লাসের ছেলে হইলেও আমার অবিলম্বে চিন্তের সহিত পরিচিত হইবার ও আলাপ করিবার বিশেষ অসুবিধা হয় নাই। তাহার কারণ, আমার স্বর্গীয় মণিকাকা। আজ কত বৎসরের পর আবার মণিকাকার কথা, মণিকাকার মুখখানি মনে পড়িতেছে। মণিকাকা ও আমি এক গ্রামের ছেলে। দুই জনেই, হাতে খড়ি হওয়া অবধিই, আমাদের গ্রামের বাংলা স্কুলে পড়িতাম এবং বরাবরই এক ক্লাসে পড়িতাম। ক্লাসের পড়াশুনায় আমরা সব চেয়ে ভাল ছিলাম এবং আমাদের মধ্যে বিশেষ সৌহার্দ্য ছিল। দৈবদুর্বিপাকে আমি ছাত্রবন্তির দ্বিতীয় শ্রেণী হইতে অন্তত চলিয়া যাই, মণিকাকা ছাত্রবন্তি পাশ করেন। আবার যখন কিছুদিন পরে আসিয়া লঙ্গন মিশনরা, স্কুলের ষষ্ঠ শ্রেণীতে ভর্তি হই, মণিকাকা তখন সপ্তম শ্রেণীতে পড়েন, স্থুতরাঙ্গ তিনি ও চিন্তরঞ্জন এক ক্লাসের ছাত্র হইলেন।

চিন্তরঞ্জন ভর্তি হইবার অতি অল্পদিন পরেই দেখিলাম যে মণিকাকার সহিত চিন্তের একটু বিশেষ রকমের বন্ধুত্ব জন্মিয়াছে। দুই জনে ক্লাসে ঠিক পাশাপাশি বসিতেন, দেড়টার ছুটীর সময় দুইজনে একসঙ্গে বেড়াইতেন এবং বিকালবেলা স্কুলের ছুটী হইলে

চিরঙ্গনের জন্য যে গাড়ী আসিত, সেই গাড়ীতে মণিকাকা
তাহার সঙ্গে যাইতেন। ফলকথা, স্কুলে আসিয়া মণিকাকা ও
চিরঙ্গন তিলান্ধিকাল তফাই থাকিতেন না। এণ্ট্রান্স পরৌক্ষা
দিবার পূর্বেই মণিকাকার মৃত্যু হয়; কিন্তু আমি বিশেষ জানি
যে, ভবিষ্যৎ-জীবনে চিরঙ্গন কখন মণিকাকার কথা ভুলেন নাই।

মণিকাকা যেদিন আমাকে তাহার বন্ধুর সহিত আলাপ
করাইয়া দিলেন, সেই দিনই আমি তাহার সহিত কথাবার্তায় ও
তাহার স্মৃতি ব্যবহারে অতীব মুগ্ধ হইলাম। তখনে স্কুল
বসিবার আগে যতটুকু সময় পাইতাম, সেই সময়ে ও মধ্যাহ্ন-
ভুট্টীর সময়ে আমি উহাদের সঙ্গে মিলিতাম। বিকাল বেলা
আমার সহিত উহাদের আর দেখা হইত না, কারণ আমি
থাকিতাম খিদিরপুরে। আমি ও চিরঙ্গন একত্র হইলে
আমাদের উভয়ের মধ্যে বেশীর ভাগ কবিতা লইয়া আলোচনা
হইত। আমাদের কবিতার আলোচনার অর্থ, আমরা সে সময়ে
আমাদের ঘ্যায় বালকের পাঠ্য যে কবিতা পড়িয়াড়ি তাহাই
আবৃত্তি করিতাম এবং কোন্টী কেমন রচিত ও কেমন মধুর
সেই সম্বন্ধেই কথাবার্তা কহিতাম। চিরঙ্গনের অনেক কবিতা
মুখস্থ ছিল এবং আমার নিজের বোধ হয় চির অপেক্ষাও বেশী
মুখস্থ ছিল। অন্ন কথায় এইটুকু বলিতে পারি যে, আমি
পঞ্চপাঠ প্রথম ভাগের “এই ভূমণ্ডল দেখ কি স্থখের স্থান”
হইতে আরম্ভ করিয়া পঞ্চপাঠ তৃতীয় ভাগের শেষ কবিতার
শেষ ছত্র পর্যন্ত তখন মুখস্থ বলিতে পারিতাম। ইহা বোধ
হয় আমার ছাত্রবৃত্তি স্কুলে পড়ার ফল, অথবা আমার সেই

দেশবন্ধু-কথা

স্কুলের পূজ্যপাদ শিক্ষকগণের প্রদত্ত শিক্ষার ফল। পুস্তকে
পড়া কবিতার আলোচনা করিতে করিতে আমাদের আর এক
অভ্যাস আসিয়া পড়িল। আমরা আবার নিজে নিজে ক্ষুদ্র
কবিতা রচনা করিতে আরম্ভ করিলাম।

এক একদিন চিন্ত বাটী হইতে একটী কবিতা লিখিয়া
আনিত এবং আমার ও মণিকাকার নিকট পড়িত, আমরা তাহার
সমালোচনা করিতাম; আবার একদিন আমি একটী কবিতা
লিখিয়া আনিতাম, মণিকাকা ও চিন্ত তাহার সমালোচনা
করিতেন। মণিকাকা বড় লিখিতেন না, কিন্তু তিনি সমালোচক
ছিলেন খুব ভাল। আমার বেশ স্মরণ আছে যে, চিন্তের
প্রতোক কবিতাটি অত্যন্ত সুন্দর, ভাবপূর্ণ ও মধুর হইত, কিন্তু
আমার কবিতা সেরূপ হইত না, যদিও মণিকাকা ও চিন্ত
আমার কবিতারও বিশেষ প্রশংসা করিতেন। চিন্তের রচনা
যে গভীর ভাবপূর্ণ ও মধুর হইত তাহা পাঠক সহজেই অনুমান
করিতে পারেন, কারণ চিন্ত তাহার মধ্য জীবনে লিখিত ‘মালা,’
‘মালঞ্চ,’ ‘সাগর-সঙ্গীত,’ ‘কিশোর-কিশোরা’ ও ‘অন্তর্যামী’-
প্রমুখ অনেকগুলি ক্ষুদ্র ক্ষুদ্র পুস্তকে একজন প্রকৃত কবিরই
পরিচয় দিয়া গিয়াছেন।

এইভাবে আমরা তিনি বৎসর কাল বড়ই আনন্দে লগ্ন
মিশনরী স্কুলে কাটাইয়াছিলাম। চিন্তের কবিতায় রচনা-
কৌশলের, মাধুর্যের ও ভাব-গান্তীর্ঘ্যের উত্তরোত্তর উন্নতি দেখা
যাইতে লাগিল। এখানে একটু কথা বোধ হয় বলা উচিত যে,
আমরা কেবল কবিতা লিখিয়া বা আলোচনা করিয়া বেড়াইতাম

মা, স্কুলের পড়াশুনায়ও আমরা খুব ভাল ছিলাম। আমার
ক্লাসে আমি ছিলাম প্রথম এবং চিন্তাদের ক্লাসে, বোধ হয়
মণিকাকা প্রথম ও চিন্তা দ্বিতীয় ছিল। এখানে একটী কথা
বলা উচিত। মনীষীরা বলেন, প্রতোক মনুষ্যেরই বালা-জীবনের
কার্যাকলাপে তাহার ভবিষ্য জীবনের কিছু কিছু আভাস পাওয়া
যায়। আমি কিন্তু চিন্তের বালাজীবনে তাহার ভবিষ্য জীবনের
কোন আভাসই বুঝিতে পারি নাই। তবে আমার বোধ হয়
এ আভাস বুঝিতে পারেন তিনি, যাঁহার বুঝিবার শক্তি হইয়াছে
এবং শিনি প্রকৃত জ্ঞানী। একজন বালক বোধ হয় বিশেষ
বন্ধুত্ব গাকিলেও তাহার সঙ্গী ও সহপাঠী অপর বালকের বালা-
জীবনে তাহার ভবিষ্য জীবনের কোন চিঙ বা লক্ষণই ধরিতে
পারে না।

আমি যখন লঙ্ঘন মিশনরী স্কুলের দ্বিতীয় শ্রেণীতে পড়ি,
তখন সংসার-সমুদ্রের এক ঘোর আবদ্ধের মধ্যে পড়িয়া
আমাকে স্কুল ত্যাগ করিতে হয়। স্কুলের প্রতোক
শিক্ষকেরই আমি অত্যন্ত প্রিয় ঢাক্ক ছিলাম বলিয়া তাঁহারা
সমবেত হইয়া আমাকে রাখিবার জন্য বিশেষ চেষ্টা করিয়া-
ছিলেন। কিন্তু আমাকে রাখিতে পারিলেন না, আমাকে স্কুল
ত্যাগ করিতেই হইল। তবে আমার সেই স্বর্গগত শিক্ষকগণের
প্রতি আমার হৃদয়ের গভীর কৃতজ্ঞতা আমার জীবনের শেষ দিন
পর্যন্ত অক্ষুণ্ণ থাকিবে।

আমার স্কুল ঢাক্ক যাইবার শেষ দিন যখন উপস্থিত হইল,
তখন স্কুলের অধ্যক্ষ সেই শুভকেশ, শুভশম্ভু, সৌম্যমুক্তি,

খ্যাতনামা পাদরী জনসন্ সাহেবে সমস্ত শিক্ষকগণের সম্মুখে
আমাকে আহ্বান করিয়া আমার হস্তে তাঁহার স্বহস্তলিখিত
একখানি সার্টিফিকেট দিলেন। সেই সার্টিফিকেটখানি
দিবার সময় সেই প্রশান্ত গন্তীরমূর্তি পাদরী সাহেবের চক্ষুদ্বৰ্য
অঙ্গপূর্ণ দেখিয়া আমি নিজেও অঙ্গ-সংবরণ করিতে পারি নাই।
সেই সার্টিফিকেটে তিনি যে কয়টী কথা লিখিয়াছিলেন তাহা
এখানে বলিবার স্থান নহে, তবে আমি তাহার একটী বর্ণও এ
জীবনে ভুলিব না। সেই দিন স্কুল হইতে বিদায় হইয়া আসিবার
সময় আমি আর একজনের চক্ষে জল দেখিয়াছিলাম—সে
চিত্তরঞ্জনের। সেই দিন আমার স্কুলের ছাত্রজীবনের শেষ
হইল এবং চিত্তরঞ্জনের সহিত দেখাশুনাও প্রায় শেষ হইল।

অতি অল্প বয়সেই ছাত্রজীবন ত্যাগ করিয়া আমি অন্য জীবন
অবলম্বন করিতে বাধ্য হইলাম। ইহার প্রায় একবৎসর পরে
চিত্তরঞ্জনের সহিত আমার একদিন সাক্ষাৎ হইল। চিত্তরঞ্জন
বোধ হয় সন্ধান লইয়াই গড়ের মাঠের ভিতরে আমার প্রাত্যাহিক
গন্তব্য পথের এক পার্শ্বে আসিয়া দাঁড়াইয়া আমারই প্রতীক্ষা
করিতেছিল। চিত্তরঞ্জন বলিল, “আমি এখন দ্বিতীয় শ্রেণীতে
পড়িতেছি, আর এণ্ট্রান্স ক্লাসে না পড়িয়া এই বৎসরই প্রাইভেট
ছাত্র হইয়া এণ্ট্রান্স পরীক্ষা দিব সংকল্প করিয়াছি। তুমিও ত
তাই দিতে পার, তুমি যাহা শিখিয়াছ তাহাতেই তোমার হইবে,
আর পড়িবার আবশ্যকতা নাই।” এতদিন পরে চিত্তরঞ্জনের
এত চেষ্টা করিয়া আমার সহিত সাক্ষাৎ ও আমাকে ত্রি কয়টী
কথা বলায় তাহা আমার হৃদয় স্পর্শ করিল। আমার মনে মনে

প্রথম পরিচ্ছদ

ঐরূপ সংকল্প ছিল, শুতরাং চিত্তের কথায় আমি স্বীকৃত হইলাম।
তাহার পর আর দুজনে দেখসাক্ষাৎ হয় নাই। ইহা বোধ
হয় আমারই দোষ; কিন্তু আমার এ দোষ স্বভাবজাত। ইহা
আমি জীবনে কখনও সংশোধন করিতে পারিলাম না।

যথাসময়ে টেফ্ট পরীক্ষা দিবার জন্য কলিকাতার স্কুল-ইনস্পেক্টর
আফিসে দুইজনেই উপস্থিত হইলাম। দুইজনের আবার সাক্ষাৎ
হইল। দুইজনে পাশাপাশি বসিয়া পরীক্ষা দিলাম। বোধ
হয় দুই দিন বা তিন দিন দুইজনেরই উক্ত আফিসে যাইতে
হয় এবং সমস্ত দিন বসিয়া প্রশ্নোত্তর লিখিতে হয়। যাহা হউক
যথাসময়ে আমরা এণ্ট্রান্স পরীক্ষা দিবার অনুমতি পাইলাম
এবং পরীক্ষা দিলাম। সে বৎসর ১৮৮৪ আগস্টাকে আদৌ পরীক্ষা
হইল না, নৃত্বন নিয়মানুসারে ১৮৮৫ আগস্টাকে এপ্রিল মাসে
হইল। প্রতাহ প্রাতঃকালে কয়েক ঘণ্টা ধরিয়া এক একটী
বিষয়ের প্রশ্নোত্তর লিখিতে হইত, এইভাবে পরীক্ষা চলিল
নয় দিন।

আমি আসি এক দিক হইতে, চিত্ত আসে অপর দিক হইতে;
শুতরাং অবসর মত দেখসাক্ষাত্তের কোনই সন্তোষনা ছিল না।
তবে প্রতাহ পরীক্ষা-মন্দির হইতে বাহির হইয়া রাস্তায় আসিয়াই
সংস্কৃত কলেজের পার্শ্বস্থ রাস্তার উপর আমার সেই
শ্রেহময় শিঙ্ককদ্বয় স্বর্গীয় রাখালচন্দ্ৰ বন্দোপাধ্যায় ও পূর্ণচন্দ্ৰ
মুখোপাধ্যায়কে দেখিতে পাইতাম। তাহাদের আহবানে আমাকে
ও চিত্তকে তাহাদের সম্মুখে প্রতাহই উপস্থিত হইতে হইত।
তাহারা প্রশ্নোত্তর সম্বন্ধে আমাদের দু'একটী কথা জিজ্ঞাসা

দেশবন্ধু-কথা

করিয়া মস্তক স্পর্শপূর্বক আমাদিগকে আশীর্বাদ করিতেন
এবং তাহার পর আমরা আপন আপন গন্তব্য পথে চলিয়া
যাইতাম।

এই এণ্ট্রান্স পরীক্ষার শেষ দিনের পর হইতে চিত্তরঞ্জনের
বিলাত যাওয়ার পূর্ব পর্যন্ত আর আমাদের সাক্ষাৎ হয় নাই।
কিন্তু যথাসময়ে পরীক্ষার ফল প্রকাশিত হইবার পর দিনই
আমি চিত্তরঞ্জনের একখানি পত্র পাই। সে পত্রে চিত্ত বড়
মিষ্ট ভাষায় তাহার হৃদয়ের আনন্দ জ্ঞাপন করিয়াছিল। আমি
অবশ্য এই পত্রের উক্তরে চিত্তের কৃতকার্য্যতায় আমার আনন্দ ও
চিত্তের প্রতি আমার হৃদয়ের প্রীতি জ্ঞাপন করিয়াছিলাম।

চিত্ত প্রেসিডেন্সী কলেজে এফ. এ. পড়িতে গেল, আমি
যেখানে ছিলাম সেইখানেই রহিলাম। কলেজে পড়া আমার
ভাগ্যে না থাকিলেও ১৮৮৭ খ্রীষ্টাব্দে যথাসময়ে আমি এফ. এ.
পরীক্ষায় উপস্থিত হইয়াছিলাম। চিত্তও পরীক্ষা দিয়াছিলু।
যদিও এই দুইবৎসরের মধ্যে একদিন এক মুহূর্তের জন্যও উভয়ের
দেখাসাক্ষাৎ হয় নাই, তথাপি যথাসময়ে পরীক্ষার ফল প্রকাশিত
হওয়ার পরই চিত্তের আনন্দজ্ঞাপক ঠিক পূর্বের মত একখানি
পত্র পাই। আমিও যথাসাধ্য তাহার অনুরূপ জবাব দিই।

আবার দুইবৎসর কাটিয়া গেল। ১৮৮৯ খ্রীষ্টাব্দে যথাসময়ে
আমি বি. এ. পরীক্ষা দিলাম। কোন কারণে চিত্ত এইবার
বি. এ. পরীক্ষা দিতে পারে নাই, কিন্তু পরীক্ষার ফল প্রকাশিত
হইলেই আমি সফলমনোরথ হইয়াছি দেখিয়া চিত্ত আমাকে যে
পত্রখানি লিখিয়াছিল, তাহার অনুরূপ পত্র এজীবনে আমি



ମା-ବାପ

ମାତା ନିଶ୍ଚାରିଣୀ ଦେବୀ ଓ ପିତା ଭୁବନମୋହନ ଦାଶ

দেশবন্ধু-কথা

পাতা—২



চলনা র বেণিড়ে । ১৮ জুন ১০।

কাহুরও নিকট পাই নাই। আমি তৎক্ষণাতে চিত্রের প্রতি আমার হৃদয়ের প্রীতি ও কৃতজ্ঞতাবাঙ্গিক একখানি উত্তর দিয়াছিলাম। আমার কতবার ইচ্ছা হইয়াছিল, একবার চিত্রের বাটী আসিয়া তাহার সহিত সাক্ষাৎ করিঃ; কিন্তু তাহা করি নাই। আমার এ দোষের কথা ত পূর্বেই বলিয়াছি। বড় দুঃখের বিষয় যে, উল্লিখিত তিনখানি চিঠির একখানিও আমি আজ খুঁজিয়া পাইলাম না। যদি তার একখানিও আজ আমি বাহির করিতে পারিতাম তাহা হইলে তাহা তইতেই পাঠক চিত্রঞ্জনের বালা-হৃদয়ের কোমলতা, মধুরতা ও উচ্চতার প্রকৃষ্ট পরিচয় পাইতেন। পর বৎসর ১৮৯০ খ্রীষ্টাব্দে চিত্রঞ্জন বি. এ. পরীক্ষায় উঙ্কুর্গ হয় এবং বোধ হয় সেই বৎসরেই বিলাত-বাতা করে।

আমি ১৮৯১ খ্রীষ্টাব্দে ওকালতী পর্বান্ধায় পাস করিয়া ঐ সালের সেপ্টেম্বর মাসে হাইকোর্টে প্রবেশ করি এবং চিত্রঞ্জন তাহার তিন বৎসর পরে অর্থাৎ ১৮৯৪ খ্রীষ্টাব্দে কলিকাতায় প্রত্যাবর্তন করিয়া ব্যারিষ্টারদ্বয়পে হাইকোর্টে প্রবেশ করে। অনেকদিন পরে আবার আগাদের এই কোর্টে সাক্ষাৎ। এখন চিত্রে চেহারার অনেক পরিবর্তন হইয়াছে। দীর্ঘাকার বলিষ্ঠ দেহ পূর্ণাবয়ব যুবাপুরুষ—কিন্তু মুখে সেই বালাকালের কান্তি ও কোমলতা সমভাবেই আছে, তবে অপেক্ষাকৃত তেজব্যঙ্গিক। প্রথম সাক্ষাতে সেই সুর্মিষ্ট হাঁসি ও সাহসী আলিঙ্গন একেবারেই আমাকে লঙ্ঘন মিশনরী স্কুলের বাল্যজীবন স্মরণ করাইয়া দিল।

যাহা হউক, ব্যবহারাজীবজীবনের প্রথম দুর্দশা চিত্রঞ্জনকে বেশী দিন ভুগিতে হয় নাই; না হইবারই ত কথা। তাহার

পিতা সেসময়ে হাইকোর্ট একজন খ্যাতনামা এটর্ণি এবং তাহার জ্যোষ্ঠতাত একজন প্রসিদ্ধ উকীল। অন্নদিনের মধ্যেই চিত্তরঞ্জনের ব্যবসায়ে উন্নতি হইতে আরম্ভ হইল। পিতা এটর্ণি হইলেও চিত্তরঞ্জন ওরিজিন্যাল সাইডে বিশেষ কাজ করিত আমার মনে হয় না। তবে হাইকোর্টের ফৌজদারী বেঁকে এবং মফঃস্বলে ফৌজদারী আদালতে তাহার কাজ বেশী হইল এবং তাহা হইতেই অর্থাগম।

আমিও প্রথম কয়েক বৎসর বেশীর ভাগ ফৌজদারীতে ছিলাম এবং অনেক ফৌজদারী মোকদ্দমা করিতে মফঃস্বল যাইতাম, স্বতরাং চিত্তরঞ্জনের কাজকর্ম লক্ষ্য করিবার আমার সুযোগ ও সুবিধা হইয়াছিল। দুইটী কথা এখানে বলা প্রয়োজন; প্ৰথমতঃ, চিত্তরঞ্জনের বকৃতা শুনিয়া কখনও কোন হাইকোর্টের জজ বা মফঃস্বলের হাকিমকে ধৈর্যচূয়ত হইতে দেখি নাই এবং কোন জজ বা হাকিম বা বিরুদ্ধ-পক্ষীয় উকীল বা কোন্সলীর কথায় চিত্তরঞ্জনের কখনই ধৈর্যচূয়তি দেখি নাই। দ্বিতীয়তঃ, চিত্তরঞ্জনের মুখ সর্বদাই সুপ্রসন্ন থাকিত, তাহার ব্যবহারে বিরুদ্ধ-পক্ষাবলম্বী কোন উকীল বা ব্যারিষ্টারের কখনও মনঃকষ্টের কারণ হয় নাই।

ব্যারিষ্টারীতে চিত্তরঞ্জনের উত্তরোত্তর শ্রীবন্ধি, প্রচুর অর্থাগম ও যশোবিস্তার হয়—ইহা সকলেই বিদিত আছেন। কিন্তু ইহার মূল কারণ এই যে চিত্তরঞ্জন মোকদ্দমার কাগজপত্র পুজ্জনানুপুজ্জন-রূপে দেখিত এবং মকেলের কার্য একাগ্রচিত্তে ও ঐকাণ্ডিক পরিশ্রমসহকারে করিত। কয়েকটী বড় ও জটিল দেওয়ানী

মোকদ্দমায় চিত্তরঞ্জনের বিরুদ্ধে পক্ষে থাকিয়া আসি তাহার অসৌম উন্নতির উল্লিখিত কয়টী গৃহ কারণ উপলক্ষি করিয়াছিলাম। আমি বিশ্বাস করি তাহার এই কয়টী গুণই শেষে তাহার রাজনীতিক জীবনে তাহাকে দেশের সহস্র সহস্র শিক্ষিত বাস্তির শৈর্ষস্থানীয় ও একচ্ছত্র নেতা করিয়াছিল।

১৯০৩ কি ১৯০৪ খ্রীষ্টাব্দে (বৎসরটী ঠিক আমার স্মরণ হইতেছে না) আমি ও চিত্তরঞ্জন উভয়ে একটী মোকদ্দমা উপলক্ষে ধূব্রড়ী যাই। এই মোকদ্দমা উপলক্ষে আমাদের উভয়কে প্রায় তিনি সপ্তাহকাল ধূব্রড়ীতে থাকিতে হয়। চিত্তরঞ্জন ছিল বিজ্ঞীরাজপক্ষে, আমি ছিলাম বিজ্ঞীরাজের বিরুদ্ধে পক্ষে অর্থাৎ গারোদিগের পক্ষে। অনেক দিনের পর আবার একত্র হইয়া এই তিনি সপ্তাহকাল কি আনন্দে কাটাইয়াছিলাম তাহা মনে করিতে আমার চক্ষে জল আসে। সমস্ত দিন অবশ্য দুইজনে দুইপক্ষের মোকদ্দমার কার্য্য লইয়া থাকিতাম; কিন্তু প্রতাহ অপরাহ্নে দুইজনে একত্র হইয়া সুন্দর স্বপ্রশস্ত ব্রহ্মপুর নদের তীরে বেড়াইতাম, আর বাল্যকালের কত কথারই আলোচনা করিতাম। আবার সন্ধ্যার পর একত্র বসিয়া প্রায়ই অনেক রাত্রি পর্যন্ত বাল্যকালের মত কবিতার আলোচনা করিতাম।

এই সময়ে আবার যেন আমাদের সেই লঙ্ঘন মিশনরী স্কুলের বাল্যজীবন ফিরিয়া আসিয়াছিল। কিন্তু এসময়ের আলোচ্য কবিতা সেই বাল্যকালের কবিতা নহে। এসময়ের আলোচনা কেবল বঙ্গের চিরগোরবের জিনিস বৈষ্ণব কবিগণের সুমধুর

পদাবলী লইয়া। বৈষ্ণব কবিগণের পদাবলী চিত্তরঞ্জনের এক-প্রকার কর্ণস্থ ছিল, আমার সেরূপ ছিল না। স্মৃতৰাং এই মধুর পদাবলীর আবহনি সময়ে আমি কেবলই শ্রোতা ছিলাম। বেশ বুঝিয়াছিলাম যে, বৈষ্ণব ধর্মের গৃচ্ছত্ব এবং কৃষ্ণলীলার মাধুর্যা চিত্তরঞ্জনের হৃদয় সম্পূর্ণরূপে অধিকার করিয়াছে। ধুব্ডী হইতে ফিরিবার পর অনেকদিন পর্যন্ত চিত্তরঞ্জনের আহ্বানে তাহার বাটীতে মাঝে মাঝে সন্ধ্যার সময় কার্ত্তন শুনিতে যাইতাম; একসঙ্গে বসিয়া কার্ত্তন শুনিতাম। বুঝিতাম, প্রকৃত ভগবৎপ্রেম চিত্তর হৃদয় আচ্ছন্ন করিতেছে।

ক্রমে চিত্তরঞ্জনের বাবসায়ে উন্নতি ও অর্থাগমের বৃদ্ধি হইতে লাগিল। দেশমাত্রকার কল্যাণে চিত্তরঞ্জন ক্ষক্ষাত্তরে পরিশ্রম করিতে লাগিল। শৈযুক্ত অরবিন্দ ঘোষের/মোকদ্দমা হইতে চিত্তরঞ্জনের দেশের কাজের জন্য অকাতরে স্বার্থত্যাগ আরম্ভ হইল। চিত্তরঞ্জনের স্বার্থত্যাগের সূচনা বুঝিতে গেলে, আমার মনে হয়, চিত্তরঞ্জনের পরদুঃখকাতরতা ও অনুপমেয় দানশীলতায় তাহা পাওয়া যায়। এই সময় হইতেই চিত্তরঞ্জন অপরিমেয় অর্থ উপার্জন করিতে আরম্ভ করিল, কিন্তু তাহার অপরিমেয় দানে এবং তদুপরি নিজের পরিবারবর্গের শারীরিক সুখসচ্ছন্দতার জন্য ও পরহিতে তাহা নিঃশেষিত হইতে লাগিল।

একটী কথা আমার স্মরণ হইতেছে, তাহা এখানে না বলিয়া থাকিতে পারিতেছি না। আমাদের বকুল বাগানে যে উচ্চ প্রাথমিক স্কুলটী আছে, এ স্কুলটীর জন্য একখানি নৃতন গৃহ নির্মাণ আবশ্যক হইল। প্রায় আড়াই হাজার টাকা ব্যয়

হইবে স্থির হইল। আমিই উদ্যোগ করিয়া কৃষ্ণটী আরম্ভ
করিলাম। চিত্তরঞ্জনের নিকট কিছু বেশী সাহায্য পাইব মনে
করিয়াই কার্য্য আরম্ভ করিলাম এবং চিত্তকে তাহা বলিলাম।
আমি একবারমাত্র বলায় চিত্ত স্বীকৃত হইল। কিন্তু মাঝে
মাঝে লোক পাঠাইয়াও যখন চিত্তের সাহায্য পাই নাই, তখন
একদিন রাগ করিয়া চিত্তের বাটীতে গেলাম। রাগ ও দুঃখ
করিয়া দু'চারি কথা বলিতেই চিত্ত আমার হাত ধরিয়া বসাইল
এবং যাহা আমাকে দেখাইল তাহাতে আমি নির্বাক হইলাম।
দেখিলাম, প্রতি মাসেই চিত্তে যে কত প্রকারের দান আছে
তাহার ইয়ন্ত্রা নাই। চিত্ত প্রচুর অর্থ উপায় করিলেও প্রায়
রিক্তহস্ত আমি আর কিছু বলিতে পারিলাম না; তাহার
সাধ্যমত সে যাহা দিবে আমি তাহাতেই সন্তুষ্ট হইব বলিয়া
চলিয়া আসিলাম।

শ্রীশরচন্দ্র রামচৌধুরী

ହିତୀଯ ପରିଚେଦ

ଜୀବନ-କଥା

ଇଂରାଜୀ ୧୮୭୦ ଶ୍ରୀମଟୀଙ୍କେର ୫ଟେ ନଭେମ୍ବର ତାରିଖେ କଲିକାତା ମହାନଗରୀତେ ଚିତ୍ତରଞ୍ଜନ ଦାଶ ଜନ୍ମଗ୍ରହଣ କରେନ । ତିନି ପିତ୍ର-ମାତାର ପ୍ରଥମ ସନ୍ତ୍ଵାନ । ତିନି ଯେ ବଂଶେ ଜନ୍ମାଭ କରିଯାଇଲେନ, ତାହା ଅତି ପ୍ରାଚୀନ ବୈଦ୍ୟବଂଶ । କିଂବଦ୍ଵାତ୍ରୀ ଆଜେ ଯେ, ଏହି ବଂଶେର ବହୁଲୋକ ପୁରାକାଳେ ବାଙ୍ଗଲାର କୋନ କୋନ ଅଂଶେ ବାଜୁଥିବା କରିଯାଇଲେନ । ଉଦାରତା, ମନସ୍ଵିତା, ଜ୍ଞାନ, ସ୍ଵାଧୀନଗ୍ରା-ପ୍ରିୟତା ପ୍ରଭୃତି ଯେ ସକଳ ସଦ୍ଗୁଣ ମାନୁଷେର ଥାକିତେ ପାରେ— ଏହି ସକଳ ସଦ୍ଗୁଣ ଲାଭ କରିଯା ଏହି ପ୍ରାଚୀନ ବଂଶଟି ବିଶେଷ ଖ୍ୟାତିଲାଭ କରିଯାଇଛେ ।

ପୂର୍ବବଙ୍ଗେ ବିକ୍ରମପୁରେର ଅନ୍ତର୍ଗତ ଆଡ଼ିଯାଲ ବିଲେର ପାର୍ଶ୍ଵେ ତେଲିରବାଗ ନାମେ ଏକଟି ଗୁଗ୍ରାମ ଆଛେ । ଚିତ୍ତରଞ୍ଜନେର ପୂର୍ବ-ପୁରୁଷଗଣ ଇଦାନୀଂ ଏହି ଗ୍ରାମେ ଆସିଯାଇ ବସବାସ କରିତେଇଲେନ । ଚିତ୍ତରଞ୍ଜନେର ପିତାମହ କାଶୀଶ୍ଵର ଦାଶ ମହାଶୟ ଏକଜନ ଜ୍ଞାନୀ ଓ ପ୍ରତିଭାଶାଲୀ ବ୍ୟକ୍ତି ଛିଲେନ, ଏବଂ ସେଇହେତୁ ଗ୍ରାମେର ସକଳ ଲୋକଙ୍କ ତାହାକେ ଭଡ଼ି-ଶ୍ରଦ୍ଧା କରିତ ।

କାଶୀଶ୍ଵରେର ତିନି ପୁତ୍ର,— ଦୁର୍ଗମୋହନ, କାଲୀମୋହନ ଓ ଭୁବନ-ମୋହନ । ଦୁର୍ଗମୋହନେର ତିନି ପୁତ୍ର, ପରଲୋକଗତ ସତ୍ୟରଞ୍ଜନ, ରେଣ୍ଡୁନେର ଭଜ ଜ୍ୟୋତିଷରଞ୍ଜନ, ଓ ବାଙ୍ଗଲାର ଏଡ୍ଭୋକେଟ୍-ଜେନାରେଲ

মন্তৃশরঙ্গন। ভুবনমোহনেরও তিনটি পুত্র, চিত্তরঙ্গন, প্রফুল্লরঙ্গন ও বসন্তরঙ্গন। কালীমোহনের কোন পুত্রাদি হয় নাই, এজন্য তিনি বসন্তরঙ্গনকে পোষ্টপুত্ররূপে গ্রহণ করিয়াছিলেন। যৌবন-কালে তিনি ভাতাই ব্রাহ্মধর্ম গ্রহণ করিয়াছিলেন, কিন্তু পরবর্তী-কালে কালীমোহন প্রায়শিকভাবে করিয়া পুনরায় হিন্দুধর্মে ফিরিয়া আসেন। রসারোডের উপর যে বাটিটী চিত্তরঙ্গন সাধারণকে দান করিয়া গিয়াছেন, সেটি কালীমোহনেরই আবাস ছিল।

চিত্তরঙ্গনের পিতা ও পিতামহ বিপন্নের সাহায্যার্থ যথ-সর্ববস্ত্র দান করিতে কুঠিত হইতেন না। চিত্তরঙ্গনের পিতা ভুবনমোহন এইরূপ অত্যধিক দানের জন্য ঝণগ্রাস্ত হইয়া অবশেষে দেউলিয়া আইনের আশ্রয় লইতে বাধ্য হইয়াছিলেন।

কলিকাতাতে থার্কিয়াই চিত্তরঙ্গন বাল্যশিক্ষা সমাপ্ত করেন। এণ্ট্রান্স পাশ করিবার পর তিনি প্রেসিডেন্সী কলেজে ভর্তি হন এবং উক্ত কলেজ হইতে ১৮৯০ খ্রীষ্টাব্দে সম্মানে বি. এ. পাশ করেন। কলেজে অধ্যয়নকালে সাহিত্যে ও বাণিজ্যে অসাধারণ প্রতিভা দেখাইয়া তিনি সহপাঠী ও অধ্যাপকগণকে বিস্মিত করিয়া তোলেন।

বি. এ. উপাধি গ্রহণ করিয়া তিনি সিভিল সার্টিস্যুলেট দিবার জন্য বিলাতে যান। সেই সময় দাদাভাই মৌরজা পার্লামেন্টের সদস্য হইবার চেষ্টা করিতেছিলেন। চিত্তরঙ্গন তাঁহার পক্ষ সমর্থন করিয়া বিলাতে অনেকগুলি সভায় বক্তৃতা প্রদান করেন। তাঁহার বক্তৃতাগুলি এত সারগর্ভ ও সুন্দর হইয়াছিল যে, তারতের ও বিলাতের অনেকে সেই বক্তৃতা পাঠ

দেশবন্ধু-কথা

করিয়া বিস্মিত ও মুগ্ধ হইয়া উঠেন। ভবিষ্যৎ জীবনের শুভচ্ছ
ও শুদ্ধচ্ছ যশঃশিখারের ইহাই যেন ভূমিকামাত্র।

ইহারই কিছুদিন পরে পার্লামেণ্টের অন্যতম সদস্য মিঃ জন
ম্যাকলীন (Mr. John Maclean) ভারতের হিন্দু ও মুসলমান
সম্প্রদায়ের বিরুদ্ধে এক তীব্র মন্তব্য প্রকাশ করেন। চিত্রঞ্জন
ইহার প্রতিবাদার্থ একদিন ইংলণ্ডপ্রবাসী সকল ভারতীয়
চাতকে এক সভায় আহ্বান করিয়া ততোধিক তীব্র একটি
বক্তৃতা প্রদান করেন। তাহার অভৌতিক ফল ফলিল। মিঃ
ম্যাকলীন ক্ষমা চাহিতে ও পার্লামেণ্টের সদস্যপদ পরিত্যাগ
করিতে বাধা হইলেন।

এই ঘটনার অন্তিম পরে তিনি একটি সভায় ভারতীয়
অবস্থা সম্বন্ধে বক্তৃতা করিবার জন্য আহুত হন। এই সভার
সভাপতি ছিলেন মিঃ গ্লাডস্টোন (Mr. Gladstone). ভারতের
যে হীন ও দুর্দশাগ্রস্ত অবস্থা তিনি বাল্যাবধি দেখিয়া আসিতেছেন,
তাহা তিনি এই সভায় বিশদভাবে বুঝাইয়া বলেন। শোনা
যায়, তিনি কৃতিত্বের সহিত সিভিল সার্ভিস পরীক্ষায় উত্তীর্ণ
হইলেও এই বক্তৃতার জন্য তাহার নাম শিক্ষানবিশের তালিকা
হইতে বাদ দেওয়া হয়।

সিভিল সার্ভিসে প্রবেশলাভ করিতে না পারিয়া চিত্রঞ্জন
'ইনার টেম্পলে' ব্যারিষ্টারী পড়িতে আরম্ভ করেন। ১৮৯২
শ্রীষ্টাক্ষেত্রে তিনি সসম্মানে ব্যারিষ্টারী পরীক্ষায় সফলতা লাভ
করেন। কলিকাতায় ফিরিয়া আসিয়া ১৮৯৩ শ্রীষ্টাক্ষেত্রে কলিকাতা
হাইকোর্টের বারে যোগদান করেন। সহায় না থাকিলে শক্তির

ଶେଷକୁ-କଥା

୭୩-୧୬



ଆଟେ ଦୂରମ୍ବେ ଚିତ୍ରକଳା



‘শঙ্কার বিলাত বাট্টার পুঁ’

বিকাশলাভ সকল সময়ে ঘটিল উঠে না। চিরুরঞ্জনের ভাগোও তাহাই ঘটিল। ব্যারিষ্টারীতে তাহার স্বত্ত্বসিদ্ধ প্রতিভা সহায়-সম্পদ অভাবে রুক্ষ হইয়া রহিল। এইরূপে ঘোলটি বৎসর তিনি কষ্টে অতিবাহিত করেন। এই সময় তিনি সামান্য যাহা কিছু আয় করিয়াছিলেন, সমস্তই মফঃস্বলে ঘুরিয়া করিতে হইয়াছিল। এই কয়বৎসরের সামান্য আয় হইতে তিনি ৬৭,০০০ টাকা সংস্থান করিতে সমর্থ হন। ইহাই তাহার পিতৃ-ধারণের পরিমাণ। এই ঋণ গলিত সীসার মত দিবারাত্রি তাহার মনে স্মৃতীর বেদনা জাগাইয়া রাখিত। স্মৃতরাং প্রথম হইতেই তাহার চেষ্টা ছিল, এই ঋণ পরিশোধ করা। যখন তিনি উক্ত পরিমাণ অর্থ সংগ্রহ করিতে সমর্থ হইলেন, তখন পিতার উন্নৰ্মণ্ডিকে খুঁজিয়া বাহির করিয়া তাহাদের প্রাপ্য অর্থ দিয়া দিতে লাগিলেন।

কিন্তু তাহার গুণের মূল্য চিরকাল অপ্রকাশ রহিল না। তাহার উপেক্ষিত শক্তি একটি উপলক্ষের আশ্রয় গ্রহণ করিয়া স্বপ্রকাশিত হইয়া পড়িল। ইহা ১৯০৮ খ্রীষ্টাব্দের প্রসিদ্ধ রাজনৌতিক ঘড়্যন্ত্রের মামলার বিখ্যাত আসামী শ্রীযুক্ত অরবিন্দ ঘোষের পক্ষ সমর্থন। অরবিন্দ ঘোষের পক্ষ সমর্থন করিয়া তিনি যে কয়টি জুলন্ত বক্তৃতা প্রদান করিয়াছিলেন, তাহাতেই তাহার ব্যবহার-শাস্ত্রের অসাধারণ বৃৎপত্তি চারিদিকে ছড়াইয়া পড়িল। শোনা যায়, এই মামলা পরিচালনায় তিনি এক কপৰ্দিক অবধি গ্রহণ করেন নাই। এই সময় সংসারের ব্যয়-নির্বাহের জন্য তাহাকে তাহার গাড়ী-ঘোড়া পর্যন্ত বিক্রয় করিতে হইয়াছিল। এই

ত্যাগের ফল সঙ্গে সঙ্গেই ফলিল। ব্যবহারাজীবরূপে তাঁহার ঘণঃ চতুর্দিকে পরিব্যাপ্ত হইয়া গেল। এই মামলার পর তাঁহাকে অনেক বড় বড় মামলায় নিযুক্ত করা হয় এবং তিনিও অবিলম্বে সকলপ্রকার ফৌজদারী ও দেওয়ানী মোকদ্দমায় অপ্রতিদ্বন্দ্বী কাউন্সেলরূপে খাতিলাভ করেন। তিনি যখন ব্যারিষ্টারী কার্য পরিত্যাগ করেন, তাহার অব্যবহিত পূর্বে ভারত সরকার কর্তৃক ‘মিউনিসিন্স বোর্ডের’ মামলায় নিযুক্ত ছিলেন। এই সময় তিনি সহস্র সহস্র অর্থ উপার্জন করিতেন।

একদিকে যেমন তিনি সহস্র সহস্র অর্থ উপার্জন করিতেন, অন্যদিকে তেমনই মুক্তহস্তে দান করিতেন। তাঁহার দানের অন্ত ছিল না। শত শত অঙ্ক, দরিদ্র, তাঁহার অর্থে প্রতিপালিত হইত। বাঙ্গালার যুবকসমাজ তাঁহাকে ভাল করিয়াই চিনিত। যে তাঁহার নিকট যাহা চাহিয়াছে, সে তাহাই পাইয়াছে। প্রত্যহ কত সাহিত্যকার, বিদ্বান, সঙ্গীতজ্ঞ প্রভৃতি গুণী তাঁহার নিকট যাইতেন, এবং তিনি তাঁহাদের যে কোন অভাব বা অস্তুবিধা দূর করিতে পারিলে নিজেকে কৃতার্থ মনে করিতেন।

কাহারও হয় ত' অস্তুখ হইয়াছে, অর্থাত্বে বায়ু-পরিবর্তনের জন্য কোথাও যাইতে পারিতেছেন না,—চিত্তরঞ্জন সেই কথা শুনিয়াই প্রয়োজনের অতিরিক্ত অর্থ তাঁহাকে দান করিয়া দিলেন। সন্ধ্যার পর যে কেহ তাঁহার বাড়ীতে গেলে খাইয়া আসিতে হইত। এরূপে রাত্রিতে তাঁহার বাড়ীতে প্রায় এক শত পাতা পড়িত। সকলকে পরিতোষসহকারে তোজন করাইয়া তিনি নিজের গাড়ী দিয়া বা অন্য ভাড়াটে

গাড়ী আনিয়া সকলকে পেঁচাইয়া দিতেন। মিথ্যা জানিয়াও অনেক সময়ে তিনি অনেকের অভিযোগ মোচন করিয়াছেন।

তিনি যে কত বড় দানশাল ছিলেন, তাঁহার হৃদয়টি পরের দুঃখে যে কতখানি কাতর হইয়া পড়িত, সে সকলের স্মৃবিস্তৃত আলোচনা করা বর্তমান প্রবক্ষে সম্ভবপর নহে। তাঁহার হৃদয়টি ছিল অতুলনীয়। উচিত্যবোধে তিনি কোন দিন দান করেন নাই, দান করিতেন তাঁহার দান-ধর্ম্ম স্বভাবগত বলিয়া। ধর্মী দরিদ্র, জ্ঞানী মূর্খ, সৎ অসৎ সকলেই সমভাবে তাঁহার করুণা পাইয়া আসিয়াছে।

শ্রীবাস্মুদেব বন্দ্যোপাধ্যায়।

তৃতীয় পরিচ্ছেদ

মাতাপিতার প্রতি ভক্তি

(১)

আমি তখন আলিপুরে ওকালতি করি। একদিন হঠাৎ কোন ক্লাবে শুনিলাম তিনি ‘পিতৃঝণ’ শোধ করিয়াছেন। দেনা শোধ দিতে না পারিয়া তাঁহার পিতা ভুবন বাবু ইন্সল্ভেণ্ট অর্থাৎ দেউলিয়া হন। সেই ঝণের কতকাংশের জন্য চিত্তরঞ্জনও ইন্সল্ভেন্সি লইয়াছিলেন। এই সমস্ত দেনার আর দাবী নাই। এ দেনা পরিশোধ করিতে তিনি ইংরাজের আইনতঃ বাধ্য ছিলেন না। কিন্তু হৃদয়ের ঝণ পরিশোধ করিবার জন্য ৭৫,০০০ টাকা দেনা দিয়া পিতাকে তিনি ঝণমুক্ত করেন। জষ্ঠিস্কেচার আন্তরিক আনন্দ প্রকাশ করিয়া বলেন, “এইরূপ ব্যাপার বিলাতেও শুনা যায় নাই।”

ইহার কিছুদিন পরে তাঁহার পিতৃবিয়োগ হয়। শ্রাদ্ধের সময় পদ্মবেজে বাড়ী বাড়ী গিয়া তিনি নিমন্ত্রণ করিয়া আসেন। কদাচ কোন পাশ্চাত্যভাব তাঁহাকে বিপথে চালিত করিতে পারে নাই। তিনি বরাবর অন্তরে বাহিরে বাঙালীই ছিলেন—হিন্দু ছিলেন।

তাঁহার অসাধারণ মাতৃভক্তিরও অনেক আখ্যান আছে। মায়ের কথায় তিনি উঠিতেন বসিতেন, প্রত্যহ মায়ের নাম লইয়া কাজ করিতে যাইতেন।

ঠাকুর মোকদ্দমার দুই এক মাস পরে আমরা আর তাঁহার উপযুক্ত ফি যোগাইতে পারি নাই, কিন্তু নিজের অসচ্ছলতা সঙ্গেও তিনি মোকদ্দমা ঢাকিলেন না। এতগুলি সোনার প্রাণের মঙ্গলামঙ্গল যে তাঁহার হস্তে ন্যস্ত, এ কথা তিনি ভুলিতে পারিলেন না। মায়ের আশীর্বাদও পাইলেন, “তুই ওদের জন্য কাজ কর। অভাব থাকবে না।”

শ্রীহেমেন্দ্রনাথ দাশগুপ্ত।

(২)

বাল্যকাল হইতেই চিত্তরঞ্জন সরল ও নির্ভীক ছিলেন। সেই সময় হইতেই তাঁহার বক্তৃতাশক্তির স্ফূরণ হইয়াছিল। তাঁহার যুক্তিত্বক অমোদ ছিল, কেহ তাঁহাকে তর্কে পরাভূত করিতে পারিত না। দেশের জন্য তিনি যে অতুলনীয় স্বার্থত্যাগ করিয়াছিলেন, তাঁহার পূর্ববাতাস তাঁহার বাল্যজীবনেই দেখিতে পাওয়া যাইত। হৃদয়ের ওদায়া তিনি উত্তরাধিকারসূত্রে তাঁহার পিতৃদেব ভুবনমোহনের নিকট হইতে পাইয়াছিলেন। তাঁহার চরিত্রের আর একটা বৈশিষ্ট্য ছিল, তিনি বাল্যকাল হইতেই প্রচলিত সংস্কারের বিরোধী ছিলেন।

১৬ বৎসর ধরিয়া চিত্তরঞ্জন পিতৃঝুণ পরিশোধের জন্য ভৌষণ পরিশ্রম ও কঠোর কষ্ট সহ করিয়াছিলেন। ১৮ বৎসর পূর্বে একদিন প্রভাতে আমি চিত্তরঞ্জনের নিকট হইতে টাকা পাইয়াছিলাম। তাঁহার পিতা আমার পিতার নিকট হইতে এই টাকা ঝুণ লইয়াছিলেন। উভয়ই তখন পরলোকে। পিতৃঝুণ পরিশোধের সঙ্গে সঙ্গে চিত্তরঞ্জন আমাকে একখানি পত্রও

লিখিয়াছিলেন। এই পত্র পাইয়া, আমার বিস্ময় সীমা অতিক্রম করিয়াছিল। তখন আমার এই কথা মনে হইয়াছিল, “একসঙ্গে মানুষ হলাম; চিত্তরঞ্জন দেবতা হয়ে গেল, আমি মানুষও হ’তে পারলাম না।” এই কথাটুলি সর্ববক্ষণই আমার মানসপটে সমুদিত ছিল।

শ্রীসুরেন্দ্রনাথ মল্লিক।

(৩)

পূজার ছুটী উপলক্ষে সে বারে তিনি বায়ুপরিবর্তনের জন্য সমুদ্র-যাত্রা করেন—ফিরিয়া আসিয়া আর মাতাকে দেখিতে পান নাই। তিনি দেশে ফিরিবার পাঁচ সাত দিন পূর্বে তাঁহার মাতা দেহতাগ করেন। চিত্তরঞ্জন সর্ববদাই মাতার অত্যন্ত অনুরক্ত ছিলেন। তাঁহার মাতার মত এমন উদারমতি, স্বজনবৎসল, স্বামি-পুত্র-পরিবারের সেবানিষ্ঠ স্ত্রীচরিত্র আধুনিক হিন্দু সমাজেও বিরল। জননী ঘৃতুকালে বলিয়া গিয়াছিলেন যে, “জন্মে জন্মে যেন এই স্বামী এবং চিত্তকে পুত্ররূপে প্রাপ্ত হই।” তাঁহার ‘চতুর্থী’ উপলক্ষে আমি পুরুলিয়ায় যাই। ইহার কিছুদিন পূর্বে হইতেই ভুবন বাবু ব্যবসায় হইতে অবসর লইয়া একরূপ বানপ্রস্থ অবলম্বন করিয়া পুরুলিয়ায় যাইয়া বাস করিতেছিলেন। এই স্থানেই চিত্তরঞ্জনের জননীর সংসারলীলা সঙ্গ হয়। তাঁহার কল্পনা তাঁহার অন্তিমকালে পুরুলিয়াতে যাইয়া একত্র হইয়াছিলেন। পুরুলিয়াতেই তাঁহারা মায়ের ‘চতুর্থী’ করেন। ইহার পরদিনই চিত্তরঞ্জন দেশে ফিরিয়া আসেন। চিত্তরঞ্জনের মাতৃবিয়োগের পর হইতে তাঁহার ভিতরে একটা নৃতন ভাবের সঞ্চার হয়।

শ্রীবিপিনচন্দ্র পাল।

চতুর্থ পরিচ্ছেদ

দয়া ও দান

(১)

পরের দুঃখে তাহার মন যেমন কাঁদিত, এমন অন্নই দেখিতে পাওয়া যায়। কত লোক যে তাহার টাকায় প্রতিপালিত হইত, বলা যায় না। দাতা বলিয়া নাম লইতে তাহার একেবারেই প্রবৃত্তি ছিল না। আমি একটি দৃষ্টান্ত জানি। সে আনেক দিনের কথা—দশ বার বৎসর হইবে। একজন পাড়াগাঁয়ের সন্ত্রান্ত ব্যক্তি নানা কারণে দেশত্যাগ করিয়া একটি মিউনিসিপ্যাল টাউনে আসিয়া উপস্থিত হন। সেখানে দুই এক বৎসর বাস করার পর তাহার যত্ন হয়। তাহার পরিবারে তিন চারিটি লোক মত্তা দুরবস্থায় পড়ে। তাহারা কাহার পরামর্শে জানি না, মিউনিসিপ্যালিটির ভাইস-চেয়ারম্যানের এক পত্র লইয়া চিত্তরঞ্জন বাবুর সাহায্য চায়। তিনি বরাবর তাহাদের দশটি করিয়া টাকা পাঠাইয়া দিতেন। যিনি সাহায্য পাইতেন, তিনি বলিয়াছেন,— মাসের পহেলা তারিখে ঘড়ির কাঁটার মত টাকাটি মণি অর্ডারে তাহার নিকট পৌঁছিত। এরূপ দান চিত্তরঞ্জনের অনেক ছিল।

খবরের কাগজে দেখিলাম, দশ সাহেব ব্যারিষ্টারী ত্যাগ করিয়াছেন। ব্যারিষ্টারীতে তাহাকে কিরূপ খাটিতে হয়, তাহা আরায় গিয়া একটু দেখিয়াছিলাম এবং কিরূপ টাকা পাইতেন,

তাহাও জানিতাম। শুনিয়া আশৰ্চর্য হইয়া গেলাম। দুই
একবারমাত্ৰ তাহার বাড়ী গেলেও, তাহার অসীম দানের কথা
আমার বেশ জানা থাকিলেও, আমি জানিতাম, তাহার চালচলন
খুব উঁচু অঙ্গের। চালের জন্যও তাহাকে অনেক খরচ করিতে
হয়। সে চাল চলিবে কিৱে ? বোধ হয় কিছু করিয়াছেন,
যাহাতে অন্ততঃ চালটা বজায় থাকিবে। তাহার পৰ শুনিলাম,
তিনি সৰ্বস্ব সাধারণের উপকারার্থ দান করিয়াছেন, এমন কি,
ভিটা বাড়ীটি পর্যন্ত। আশৰ্চর্য হইয়া গেলাম। এই সময়ে
আমাদের সাহিত্য-পরিষদের পত্রিকা মহাশয় আমায় আসিয়া
বলিলেন, “শাস্ত্ৰী মহাশয়, দাশ সাহেব ত যথাসৰ্বস্ব দান করিয়া
ফেলিয়াছেন। কিন্তু তাহার অনেক বাঙালা পুঁথি আছে।
সেগুলির জন্য তিনি অনেক টাকা খরচ করিয়াছেন এবং
দুই তিন বৎসর পত্রিকা রাখিয়া সেগুলি গুছাইয়াছেন, আপনি
গিয়া চাহিলে বোধ হয়, সাহিত্য-পরিষদের জন্য পাইতে পারেন।”
কথাটা আমার পছন্দ হইল না। লোক সৰ্বস্ব ত্যাগ করিতে
পারে, কিন্তু সৌধীন লোক সখের জিনিষ ত্যাগ করিতে পারে
না। যাহা হউক, গেলাম।

আমাকে দেখিয়াই তিনি বলিলেন, “আপনি এখানে ?” আমি
বলিলাম, “আমি সাহিত্য-পরিষদের দৃত হইয়া আসিয়াছি।”
“আমার ত এখন দিবাৰ কিছু নাই যে, সাহিত্য-পরিষদের
কোনও উপকাৰ কৰিব।” আমি বলিলাম, “আমি জিজ্ঞাসা
কৰিতে আসিয়াছি, আপনি যে অনেক যত্ন করিয়া বাঙালা
পুঁথি সংগ্ৰহ কৰিয়াছেন, তাহার কি ব্যবস্থা কৰিয়াছেন ?” তিনি

বলিলেন, “হঁ, তা বটে, সেগুলোর ত কোন ব্যবস্থা করা হয় নাই, আমিও আর পাঁচ সাত দশ বৎসর তাহার কোন ব্যবহারই করিতে পারিব না। আপনারা সেগুলি চান ?” আমি হঁ বলিলে, তিনি ডাকিলেন—“সরকার !” সে আসিলে বলিলেন, “পুঁথির আলমারীর চাবি লইয়া আইস।” চাবি আনিলে চাবিটি আমার হাতে দিলেন। আমি ত স্মৃতি, আর বাক্য-স্ফূর্তি হইল না। তিনিও তাহার অন্য কাজে মন দিলেন, আমিও খানিকক্ষণ বসিয়া থাকিয়া বিদায় লইয়া আসিলাম।

সাহিত্য-পরিষদের মিটিংয়ে এই সব কথা শুনিয়া তাহারাও স্মৃতি হইয়া গেলেন। দাশ সাহেবের পুঁথিগুলি স্বতন্ত্র করিয়া একটি আলমারীতে রাখার ব্যবস্থা হইল। উহার নাম হইল ‘দেশবন্ধুর দান।’

দাশ সাহেবকে যাঁহারা ‘দেশবন্ধু’ উপাধি দিয়াছেন, তাহারা দাঁশ সাহেবকে সত্য সত্যই ভালবাসিতেন, আর বন্ধু শব্দটি ভালবাসারই ছিল। দেশও তিনি ভালবাসিতেন, দেশও ভালবাসিয়া তাহাকে বন্ধু বলিয়া বরণ করিয়া লইয়াছে।

আহুপ্রসাদ শাস্ত্রী।

(২)

দেশবন্ধুর সহিত ঘনিষ্ঠ পরিচয়ের সৌভাগ্য আমার হয় নাই, সে স্বীকৃতি আমার ছিল না। আনুমানিক সাত বৎসর পূর্বে আমি তাহার দুয়ারে এক দিন দাঁড়াইয়াছিলাম ভিক্ষাব্যপদেশে। তখনও দেশের লোক তাহাকে দেশবন্ধু বলিয়া ডাকিতে আরম্ভ করে নাই,

কিন্তু সকলেই বেশ জানিত যে, কোন একটা উপলক্ষ করিয়া ইহার নিকট হাত পাতিলে নিরাশ হইয়া ফিরিবার ভয় নাই।

আমাদের গ্রামের এক ভদ্রলোক বহুদিন আঙ্গুণ সমাজের সহিত ঘনিষ্ঠভাবে মিশিবার পর প্রৌঢ়ের সীমায় পৌঁছিয়া হঠাৎ একদিন মহাপ্রভুর প্রচারিত বৈষ্ণবধর্মে আকৃষ্ট হইলেন। দিবা-রাত্রি তাঁহার বাড়ীতে কৌর্তন ত চলিতই, বিদেশ হইতে বহু ভক্ত-জনকে নিমন্ত্রণ করিয়া মহোৎসবে গৌর-বিষ্ণুপ্রিয়ার বিগ্রহ স্থাপনের জন্য তিনি উৎসুক হইয়াছিলেন। কিন্তু টাকার সঙ্গতি তাঁহার ছিল না। তাই তিনি গেলেন চিত্তরঞ্জনের নিকট টাকা চাহিতে, আর একা যাইতে সঙ্কোচ বোধ হওয়ার জন্যই হউক অথবা অন্য কোন কারণেই হউক, আমাকে ও আমার আর একজন বন্ধুকেও যাইবার সময়ে ধরিয়া লইয়া গেলেন।

চিত্তরঞ্জনের পিতৃব্য ও পিতামহ বরিশালে ওকালতি করিয়াছিলেন। দুর্গামোহন দাশের নিকট বরিশাল অনেক রকমে ঝণী। কৃতজ্ঞতার কিঞ্চিং চিহ্নস্বরূপ বরিশালবাসী বরিশালের ‘পাবলিক লাইব্রেরী’গৃহে দুর্গামোহন দাশের একখানি চিত্র টাঙ্গাইয়া রাখিয়াছে। সুতরাং চিত্তরঞ্জনের প্রতি আমাদের একটা আইনসঙ্গত দাবী আমরা কল্পনা করিয়াছিলাম। জ্যাঠা মহাশয় যখন বরিশালের অনেক উপকার করিয়াছিলেন, তখন ভাইপো বরিশালের লোকদের সাধ মিটাইতে সাহায্য করিতে নিশ্চয়ই আইনতঃ বাধা। বিশেষতঃ চিত্তরঞ্জনও ছিলেন মহাপ্রভুর পরম অনুরক্ত ভক্ত। যাহা হউক, তাঁহার ভবানীপুরের বাড়ীতে গেলাম, দেখা পাইতেও কোন বাধা হইল না। তিনি দ্বিপ্রহরে আপনার পাঠাগারে বিশ্রাম

, করিতেছিলেন, যতদূর মনে পড়ে, একটা গদি-আঁটা চেয়ারে বসিয়া স্বরতি তামাক টানিতেছিলেন। আমরা নমস্কার করিয়া তাঁহাকে আমাদের আজী জানাইলাম। আমাদের ক্ষুদ্র গ্রামের সেই ধর্মানুষ্ঠানের জন্য তিনি ৫০ টাকা দান করিয়াছিলেন।

ইহার পূর্বেই বিখ্যাত ব্যারিষ্টার ও সুসাহিত্যিক চিত্তরঞ্জন দাশকে দর্শন করিবার সৌভাগ্য আমার হইয়াছিল। ঢাকায় একটি সাহিত্য-পরিষৎ আছে, এটি একটি স্বাধীন অনুষ্ঠান; কলিকাতার বড় পরিষদের শাখা নহে। চিত্তরঞ্জন এই পরিষদের সভাপতি নির্বাচিত হইয়াছিলেন। বার্ষিক সভার সময় সকলের আগতে তিনি ঢাকায় গেলেন; নির্দিষ্ট দিনে তিনি সভাপতির কার্যও করিলেন। সেদিনকার সভায় অনেক লোক-সমাগম হইয়াছিল। আমরা খুব বড় একটা বক্তৃতা শুনিবার আশায় সভায় গিয়াছিলাম; কিন্তু আমাদের সে আশা সফল হয় নাই। চিত্তরঞ্জন বক্তৃতা দিলেন না, দিলেন পরিষদের ভাণ্ডারে এক হাজার টাকা। কলিকাতার পরিষদের অনেক টাকা আছে, কিন্তু ঢাকার গরীব পরিষদের পক্ষে এক হাজার টাকা একটা কুবেরের ভাণ্ডার। তিনি দেশের সেবায় নিজের সর্বস্ব দান করিয়াছিলেন, এই সকল ছোট দানে তাঁহার প্রাণের পরিচয় পাওয়া গিয়াছে মাত্র।

শ্রীমুরুেন্দ্র নাথ সেন।

(৩).

দেশবন্ধু চিত্তরঞ্জন প্রাণ খুলিয়া দান করিতে পারিতেন, একথা কাহারও অবিদিত নহে। মহাভারতের যুগের দাতাদের মত কলিযুগে ত্যাগ ও দানে তিনি অক্ষয়-কৌতু রাখিয়া গিয়াছেন। তাহার দানশীলতা-প্রসঙ্গে একটী ক্ষুদ্র ঘটনা সাধারণের অবগতির জন্য লিপিবন্ধ করিলাম।

ছয় সাত বৎসর পূর্বেকার কথা। তখন মুক্তহস্ত দাতা বলিয়া দেশবন্ধুর খ্যাতি ছিল। এক পল্লীগ্রামবাসী দরিদ্র আক্ষণ-পশ্চিম কল্যানায়ে বিব্রত হইয়া দেশবন্ধুর দ্বারস্থ হ'ন। মক্কেল-পরিবৃত সেই কম্বী পুরুষের সাক্ষাৎ লাভ করিতে আক্ষণকে দুই এক দিন ঘুরিতে হয়। এত কাজে ব্যস্ত থাকিতেন তিনি যে তাহার সময় মত সাক্ষাৎ করা অনেক সময়ে অসম্ভব হইয়া পড়িত। মোটরে উঠিয়া কাছার্বাতে যাইবেন এমন সময়ে একদিন আক্ষণ সাহসে নির্ভর করিয়া তাহার নিকট পৌঁছিলেন। নিজকার্যের অতি ব্যস্ততার মধ্যেও আক্ষণের আবেদন ধৈর্যের সহিত শুনিয়া তাহাকে সাহায্য করিবেন আশা দিয়া দেশবন্ধু নিজকার্যে চলিয়া গেলেন। আক্ষণ পরদিন দেশবন্ধুর সহিত সাক্ষাৎ করিবার স্বয়েগ হঠাৎ পাইয়া তাহার নিকট গমন করিলে, দেশবন্ধু তাহাকে আর একদিন আসিতে বলিলেন। আক্ষণ দুই চারি দিন ঘুরিয়া আর একদিন আসিলেন, দেশবন্ধু তাহাকে পুনরায় আর একদিন আসিতে বলিলেন। এইরূপে প্রায় মূসাবধি কাটিলে, আক্ষণ হতাশ ও অতিষ্ঠ হইয়া পড়িলেন।

দেশবন্ধুর নিকট সাহায্য পাইবার আশা একপ্রকার ত্যাগ

করিয়া তিনি নিজের বাটীতে ফিরিবার উদ্ঘোগ করিতে লাগিলেন। বাড়ী ফিরিবেন, অথচ যাব কি যাবনা করিয়া আর একবার শেষবার দেখিয়া যাইতে তাঁহার ইচ্ছা হইল। সে দিনও কাঢ়ারীতে যাইবার সময় দেশবন্ধুর সম্মুখে তিনি উপস্থিত হইলেন। দেশবন্ধু তখন একটু লজ্জিত হইয়া বলিলেন—“আপনার কথা আমার স্মরণ ছিল না, আপনি অন্ত বৈকালে আর একবার অনুগ্রহ করিয়া আসিবেন।” ব্রাহ্মণ দেশবন্ধুর কথায় আস্থাস্থাপন করিতে পারেন নাই। তবু একটা আশার শেষ করিয়া যাইবেন ভাবিয়া সেদিন আর তিনি বাটী ফিরিলেন না। সমস্ত দিনই কালীঘাটে কাটাইয়া সন্ধ্যার সময় দেশবন্ধুর নিকট গমন করিলেন। দেশবন্ধু সেদিন উপার্জন করিয়াছিলেন ২১০০ টাকা। তিনি প্রাপ্ত ক্রস্স (Cross) চেকখানি নিজ নামে বাক্সে জমা দিয়া ব্রাহ্মণের নামে ২১০০ টাকার একখানি বেয়ারার (Bearer) চেক নিজের বাক্সের উপর কাটিয়া দিলেন।

ব্রাহ্মণ প্রথমটা কিংকর্ণব্যবিমৃত হইয়া পড়িলেন। পরে নিজেকে একটু সামলাইয়া লইয়া বলিলেন—“এত টাকা ত আমার দরকার নাই, দাশ সাহেব। আমরা গরীব লোক। চার পাঁচ শত টাকা হ'লেই আমার সব বায় সঙ্কলান হ'য়ে যাবে। আমি আপনার কাছে ৫০/১৬০ টাকা পাব আশা করে এসেছিলাম।”

দেশবন্ধু বলিলেন—“আমি সকলু করে বেরিয়েছিলাম যে, আজ যে টাকা আমি উপার্জন কর্ৰ সব আপনাকে দেব। আপনার ভাগ্যে আমি আজ যা’ পেয়েছি তাই আপনাকে দিলাম।

গ্রহণ করে আমাকে ঋণমুক্ত করুন। কন্তার বিবাহে এই টাকা, যদি আপনার আবশ্যক না হয়, বিবাহ-খরচা বাদে যা' অবশিষ্ট থাকবে, আপনি কিছু জমি কিনে ভোগ-দখল করবেন।"

আঙ্গণ-পণ্ডিত তখন পৈতা-জড়ান হস্ত দেশবন্ধুর মস্তকে দিয়া গদগদ্ধকঞ্চে আশীর্বাদ করিয়াছিলেন, "বাবা, তুমি রাজা হও!"

আমরা এখন চর্মচক্ষুতে দেখিতেছি, দেশবন্ধু সর্বস্ব দান করিয়া একপ্রকার নিঃস্ব হইয়া দেহত্যাগ করিয়াছেন। আঙ্গণের আশীর্বাদ ফলিয়াছিল কি না অর্থাৎ দেশবন্ধু রাজা হইতে পারিয়াছিলেন কিনা, সে বিচার-ভার পাঠকের উপর।

শ্রীকৃষ্ণদাস চন্দ্ৰ।

(8)

চিত্তরঞ্জনের জনক ভূবনমোহন ছিলেন দানশৌণ্ড। তাহারই অবাবহিত ফলে পিতাপুত্রকে একদিন দেউলিয়া খাতায় নাম লিখাইতে হইয়াছিল। ইন্সল্ভেটের আসামীদের সম্বন্ধে অনেকের মত আমাদেরও এই ধারণা ছিল যে, আসামীদের অনেকেই অতীতকালে নানান্ম-রকম ভোগ-বিলাসের কার্য্য সারিয়া এবং উত্তরকালের জন্য বেশ গুচ্ছাইয়া গাচ্ছাইয়া লইয়া, বর্তমানকালে পৈতা পুড়াইয়া ভগবান্ম-সাজিয়া বসেন। আইনের কারসাজী এমনই যে, দেউলিয়া আসামীকে পাওনাদার জোর জবরদস্তি ত দূরের কথা, একটি কথাও বলিতে পায় না।

অনেকের পক্ষে ইহা পরম সুবিধাজনক হইলেও, চিত্তরঞ্জনের প্রথম জীবনে ইহা যে কতদূর ক্লেশদায়ক হইয়াছিল, বলিতে

পারা যায় না। চিত্তরঞ্জন আইনব্যবসায়ে মনপ্রাণ দান করিয়া অর্থোপার্জন করিতে লাগিলেন। শোনা কথা, এই সময়ে কোন কষ্টকেই তিনি কষ্ট বলিয়া মনে করেন নাই। চিত্তরঞ্জনের কোন প্রিয়জনের নিকটে শুনিয়াছি, এই সময়ে হাইকোর্ট আসিতে ও বাড়ী যাইতে গাড়ীভাড়া পর্যান্ত তিনি খরচ করিতেন না। অনেক সময় এতখানি পথ পদত্রজে আসা-যাওয়া করিতেন। এই ‘আসা-যাওয়াও’ আবার সাধারণ লোক-চলাচলের পথে নয়,—পাছে কেহ মোটরে অথবা গাড়ীতে তুলিয়া লইয়া ‘অনুকম্পা দেখায়’ দৃঢ় আগ্রাসন্মান-জ্ঞানসম্পন্ন পুরুষবর তাই মাঠের রাস্তা দিয়া, বন্ধুবান্ধবকে এড়াইয়া চলিতেন।

জীবন-সংগ্রামে ভাগ্য পুরুষকারের নিকট পরাজয় মানিতে বাধ্য হইল ; ভাগ্যদেবী স্বহস্তে বিজয়-টাকা পরাইয়া পুরুষসিংহ চিত্তরঞ্জনকে পুরস্কৃত করিলেন। যে টাকার জন্য পিতা-পুত্রকে দেউলিয়া হইতে হইয়াছিল, সেই পরিমাণ অর্থ চিত্তরঞ্জন সঞ্চয় করিয়া দায়-মুক্ত হইলেন। এই বাঙ্গালী দেনাদারের প্রতি তখনকার হাইকোর্টের জজ ফ্রেচার সাহেবের উক্তিটি পৃথিবীর লোকের গর্বের বস্তু হইয়া আছে। জষ্ঠিস্ক্রিপ্ট ফ্রেচার-সাহেব বলিয়া-ছিলেন, “দেউলিয়া আসামী দেনা শোধের কোন চাপ না থাকিতেও যে এমন করিয়া স্বেচ্ছায়, স্বতঃপ্রবৃত্ত হইয়া পাওনাদারের টাকা মিটাইয়া দেয়, পৃথিবীর আদালতের নজীবে ইহাই প্রথম লিপিবদ্ধ হইল।”

আইনের চাপ ছিল না, জবরদস্তি ছিল না, কাহার বলিবারও কিছু ছিল না সত্য কথা ; কিন্তু বিবেকের চাপ, শ্যায়ের জবরদস্তি,

ମଧ୍ୟକୁ-କଥା

୫୬୩—୯୨



ବିଳାତେ ଛାତ୍ରାବହାର

৩০—৩১

দেশবন্ধু-কথা



বিলাত হচ্ছে ফিরিবার দ্বা

লইয়াই তাহাকে পর-জগতে কি কষ্ট পাইতে হইত, কে জানে !
পিতাকে ঝণমুক্ত করিতে পুত্রকে কি বিষময় জীবনই না বহন
করিতে হইয়াছে ! আহারে রুচি নাই, বিশ্রামে শাস্তি নাই—
পর্বতপ্রমাণ ঝণ যেন পথের সামনে অচল, অটল দুলঝা বাধা
স্থষ্টি করিয়া দাঢ়াইয়া আছে ! কিন্তু ধন্য সেই পুরুষকার,
আর ধন্য সেই পুরুষসিংহ, পর্বত যাহার পায়ের সম্মুখে মাথা
নীচু করিতে বাধা হইয়াছিল ।

কিন্তু—এর পরেও চিত্তরঞ্জনের কিছুমাত্র পরিবর্তন দেখা
গেল না । দানে-ফতুর পিতার পুত্র সাধারণ মানুষ হইলে
সাবধানেই চলিতেন, অন্ততঃ নিজের উত্তরকালের, স্ত্রী, সন্তান-
সন্তির জন্য মোটা-রকম গোছ করিয়া তবে কিছু কিছু দান
করিতেন । কিন্তু চিত্তরঞ্জন সাধারণ ছিলেন না ; যে ভগবান्
তাহাকে গড়িয়াছিলেন, তিনি তাহাকে অসাধারণ করিয়াই নির্মাণ
করিয়াছিলেন । দান-কার্য চলিতে লাগিল ; ডান হাত দান
করে, বাঁ হাত খবর পায় না । দিন নাই, ক্ষণ নাই, যোগ্য নাই,
অযোগ্য নাই—প্রসারিত হস্ত দেখিলেই চিত্তরঞ্জনের দক্ষিণ হস্ত
আপনি প্রসারিত হইত । একথা বলিলে খুব বেশী বলা হইবে না
যে, বাঙালা দেশে এমন গোক নাই যিনি চিত্তরঞ্জনের কাছে হাত
পাতিয়া রিক্তহস্ত ও শৃঙ্খলায় বহিয়া ফিরিয়াছেন । মহা-
ভারতে পড়ি, কর্ণের প্রতিজ্ঞা ছিল, প্রত্যাশী কথন তাহার দ্বারে
আসিয়া ফিরিবে না । আমাদের বাঙালী দাতা-কর্ণের সেইরূপ
কোন প্রতিজ্ঞা ছিল কি না বলিতে পারি না ; তবে কেহ যে
সত্যই ফিরে নাই, তাহা নিঃসংশয়ে বলিতে পারা যায় ।

কিম্বু, ইহাতে নৃতনভূ কিছু নাই—এই মহদ্গুণের কথা বাঙালী মাত্রেই সত্য বলিয়া জানেন, শুনিয়াছেন, এখনও শুনিতেছেন। তবে, হয়ত চিত্তরঞ্জনের অবসানের সঙ্গেই এ সকল গৌরবময় কথা গাথায় পরিণত হইয়া যাইবে। এত বড় প্রাণ কি বাঙালায় আর আছে ?

চিত্তরঞ্জন কি ভাবে দান করিতেন, তাহা অনেকেই জানেন না। পদ্ধতিতে নৃতনভূ ছিল, অসাধারণভূ ছিল। একদিনের একটী ঘটনা আমি জানি ; সেই কথাই আজ বলিতেছি।

১৯১১ কি ১২ সাল। প্রাতঃকাল। সন্ধিবৎঃ শনিবার। এক ঘর লোক বসিয়া আছেন : আজ তাঁহাদের অনেকেই দেশে ও দশে প্রতিষ্ঠাবান्। দীন লেখকও সেই বিদ্বজ্জনমণ্ডলীর মধ্যে ভাগ্যবশে উপবিষ্ট। চুরুটের ধোঁয়ায়, হাস্তকলরবে, কক্ষ সরগরম। এই সময়ে ছিল ও জীর্ণ-বসন-পরিহিত কৃশকায় এক বালক নগপদে অতি সন্তুর্পণে কক্ষ-আস্তরণে পা দিয়া— চুকিল। চিত্তরঞ্জনের প্রফুল্ল উজ্জ্বল দৃষ্টি **তৎক্ষণাৎ** সেইদিকে পড়িল। চিত্তরঞ্জন ডাকিলেন, “কি হে ছোকৱা ? এ-দিকে এস !” বালকের পিছনে দ্বারাস্তরালে থাকিয়া যে একখানি বঙ্গ-বিধবার ভূষণ-শূণ্য শীর্ণ হস্ত বালককে ধরিয়া ছিল, তাহা দেখ গেল ; বালক সে হাত ছাঢ়াইয়া অতি ভয়ে-ভয়ে, কম্পিত-বক্ষে, ততোধিক বিকম্পিত-পদে অগ্রসর হইল।

মুখে কেহ কিছু প্রকাশ না করিলেও, সেই বয়সে, আমি স্পষ্টই বুঝিতে পারিয়াছিলাম, গৃহস্বামী ব্যতিরেকে প্রায় সকলেই প্রভাত-বৈঠকের মাঝে এই ‘উপদ্রব’ দর্শনে প্রীত

হন নাই। কাহার কাহার মুখ-চোখের ভাবে তাহা শৃঙ্খলাও হইয়া উঠিয়াছিল। কিন্তু চিত্তরঞ্জন একেবারে অন্য মানুষ! দৃষ্টি বঙ্গু-বাঙ্গুবদের পানে নাই; মনও ‘বৈঠক’ ছাড়িয়া সেই কুণ্ঠিত-পদ, কম্পিত-বঙ্গ কৃশদেহ বালকের অন্তর-প্রদেশে প্রবিষ্ট হইয়া কি-যেন অন্ধেষণ করিতেছে। বালক চেয়ারের পার্শ্বে আসিয়া দাঁড়াইয়া—যেন ভয়ে, যেন লজ্জায়, শঙ্কায় মরমে মরিয়া যাইতেছিল। তাহার দুই চঙ্গু ছল-ছল করিতেছে, ওষ্ঠাধর দু'খানি কাপিতেছে কিন্তু নৌরব। চিত্তরঞ্জনের মধুর কণ্ঠস্বরে ধ্বনিত হইল—“কি চাও—বল ?” এই মধুর, সঙ্গীতময় অভয় কণ্ঠস্বর শুনিবার সৌভাগ্য যাঁহাদের হইয়াছে, তাঁহাদের আর বলিতে হইবে না, যে-কোন মানুষকে সে স্বর কত কাছে টানিত, কত আপনার করিত ! বালক কিন্তু তবুও মুখ খুলিতে পারিল না ; আবার সেই অভয় কণ্ঠস্বর ধ্বনিত হইল—“তব কি, বল !” এবার বালক সত্যই নির্ভয় হইল, কথা বলিল। কিন্তু তাহার “মা দাঁড়িয়ে আছে আর আমার বোনের বিয়ে”—এইটুকু ডাড়া আর একটি বর্ণও আমরা কেহ শুনিতে পাইলাম না ; চিত্তরঞ্জনও বোধ হয় শুনিতে পান নাই কিন্তু তাহার প্রয়োজনও ছিল না। তিনি জিজ্ঞাসিলেন “কত টাকার জন্যে আটকেচে বললে ?” বালক বলিল, ভয়ে ভয়ে —“একশ টাকা !”

চিত্তরঞ্জন কাগজের টুকরায় কি লিখিয়া, ভাঁজ করিয়া, মুড়িয়া একজনকে ডাকিয়া টুক্রাটি দিলেন ; বালককে বলিলেন—“ওর সঙ্গে যাও।” কত দিলেন, কোন খোজ না লইয়া কেন দিলেন, এ সমুদয় প্রশ্ন দর্শকদের মনে জাগিলেও মুখে আসিল না ; বালক

চলিয়া গেল। কিন্তু কিছুক্ষণ ফেন বৈঠক আর জমিল না—সব চুপ-চাপ! একজন ব্যারিষ্টার প্রথম স্তুতি ভঙ্গ করিলেন। সেই সময়েই বালক একখানি নোট হাতে আবার দরজায় দেখা দিল! একখানা নোট বটে—কিন্তু ‘একশ টাকারই!’

বালক সান্তুষ্টভাবে বলিতে গেল “মা বল্লে”—চিত্রঞ্জন স্নেহ-মধুর স্বরে বলিলেন—“হয়েছে! হয়েছে! তোমার বোনের বিয়ে হয়ে গেলে, আমাকে বলে যেও—বুর্বলে!”—আত্মপ্রশংসা শ্রবণের স্পৃহা অনেকের না থাকিতে পারে কিন্তু কৃতজ্ঞতাটুকুও যেন তাঁহার প্রাপ্য ছিল না! যেন সে তাঁহার কর্তব্য! কর্তব্যের জন্য আবার কৃতজ্ঞতা গ্রহণের প্রয়োজন কি!

মহাভারতে এক দাতার কাহিনী পড়িয়াছি, আর স্বচক্ষে, আপনার জীবনে এক দাতার কার্য দেখিয়াছি। অনেক সময় ভাবি, কাহিনী বড় না প্রত্যক্ষ যা দেখিয়াছি, তাহাই বড়।

আজ মনে পড়িতেছে, সেই কাগজের টুকুরাটি দিবার সময় সেটিকে ভাঁজ করিয়া মুড়িয়া দেওয়ার কথা,—উপস্থিত ব্যক্তিগণ কেহ না দেখিতে পান, তাহাই দাতার ইচ্ছা ছিল; বালক পুনরায় কৃতজ্ঞতা-প্রকাশ করিতে না আসিলে, চিত্রঞ্জন তাহাকে কত দিয়াছেন কেহই জানিতে পারিত না। আজ মনে পড়িতেছে, বালক নোট হাতে বাহির হইয়া যাইবামাত্র উপস্থিত বন্ধুগণের নজর যখন চিত্রঞ্জনের উপর নিবন্ধ, চিত্রঞ্জন পূর্ব প্রসঙ্গ উঠাইয়া, ঘটনাটাকে চাপা দিবার জন্য হঠাতে কথা পাড়িলেন—“সমাজপতি (৩ম্বুরেশ) আমার ‘মালফের’ একটা ভাল এডিসন করুছে.....” সে কথাটা তখনকার মত চাপা পড়িল বটে কিন্তু

ঝাঁহারা সেইদিন সেইমুহুর্তে সেইখানে উপস্থিত ছিলেন, তাহারা কোন্ কালেই সেটিকে চাপা দিতে পারিয়াছেন কি ? কত আবর্জনা, কত ঘটনা ত জমিয়াছে কিন্তু সেই-দেখা সেই-দৃশ্য চাপা পড়িয়াছে কি ? আমি ত তাহাদেরই একজন,—আমার ত কৈ চাপা পড়ে নাই ; মৃত্যুকাল পর্যান্ত পড়িবেও না ।

শ্রীবিজয়রত্ন মজুম্দার ।

(৫)

দান অনেকে করে, কিন্তু কেহ নামের জন্য, কেহ পুণ্যার্জনের নিমিত্ত, কেহ বা ভবিষ্যতের আশায় । নিঃস্বার্থ দান জগতে অতি বিরল । নৌরবে দান, অভিমিকাশূল্য দান, অঙ্গাত দান, যিনি করিতে পারেন, তিনি প্রকৃতই মহাপুরুষ । মহানুভব চিত্তরঞ্জনের দান ঐরূপই ছিল । শুধু তাহাই নহে, চিত্তরঞ্জনের চরিত্র এমন মধুময় যে কেহ তাহার দানের কথা উল্লেখ করিলে বা কৃতজ্ঞতা প্রকাশ করিতে প্রয়াসী হইলে, তিনি অতিশয় সঙ্কোচ অনুভব করিতেন । কতদিকে কতভাবে যে তিনি দান করিয়া গিয়াছেন তাহার সকল কাহিনী সংগ্রহ করা অসম্ভব । তথাপি এসম্বলে প্রত্যক্ষ বা পরোক্ষ ভাবে যিনি যাহা জানেন, তাহা প্রকাশ করিলে ভাল হয় । তদ্বারা ভবিষ্যতে চিত্তরঞ্জনের চরিত্র-লেখক সবিশেষ উপরূপ হইবেন ।

চিত্তরঞ্জন আইন-ব্যবসায়ে অজস্র অর্থ উপার্জন করিয়াছিলেন, কিন্তু তিনি সেই উপার্জিত অর্থ কেবল নিঃশেষে দান করিয়া ক্ষান্ত

হন নাই, পরিশেষে এজন্য তিনি ঝণজালে জড়িত হইয়া পড়িয়াছিলেন।

সাংসারিক হিসাবে লাভ ক্ষতির গণনায় তাহার চরিত্রের এ দুর্বলতা স্বীকার করিয়া লইলেও, ইহা যে ধর্মাভিমুখী ছিল, কে তাহা অস্বীকার করিবে? দানে তাহার অমিত বায় পরের জন্য ও দেশের নিমিত্ত, ক্ষুদ্র স্বার্থের জন্য নহে, একথা যেন আমরা বিস্মৃত না হউ। তিনি রাখিয়া ঢাকিয়া কাজ করিতে পারিতেন না, আপনাকে সম্পূর্ণভাবে বিলাইয়া দিতে না পারিলে যেন তাহার তপ্তি হইত না। এই উদার ভাবই ছিল তাহার চরিত্রের বিশেষত্ব।

এই কথাই তাহার হস্তয়ে সর্বদা জাগরুক থাকিত যে, বিধাতার কৃপায় তাহার উপার্জিত অর্থ, তাহার নহে, ইহা সর্বসাধারণের। তিনি যেন তাহার রক্ষকমাত্র। তাহাদের প্রয়োজনে ইহার সন্দাবহার না হইলে, ইহার কিছুমাত্র সার্থকতা নাই। অর্থের নিজের কোন মূলা নাই। পরার্থে প্রয়োগ করিতে পারিলেই ইহার মূলা। এই কারণেই গৃহী চিত্তরঞ্জন সর্বস্বত্ত্বাগী সন্মাসী হইতে পারিয়াছিলেন।

আমি এস্তে চিত্তরঞ্জনের দুইটি আধ্যায়িকার বিবরণ দিব, যদিও ইহার কোনটিও আমার প্রতাক্ষ-দৃষ্ট নহে, তথাপি প্রত্যক্ষদর্শীর নিকট হইতে আমি শুনিয়াছি, সুতরাং ইহা অতিরঞ্জিত নহে।

• (ক)

যখন ডুমরাওন রাজের প্রসিদ্ধ মোকদ্দমা উপলক্ষে চিন্তারঙ্গন তথায় অবস্থিতি করিতেছিলেন, ইহা সেই সময়ের কথা। তখন রাজকোষ হইতে তাহার বিপুল অর্থাগম হইতেছিল, কিন্তু সেই অর্থ কিরূপে বায়িত হইত, তাহা শুনুন।

গোবিন্দবাবুঃ বলিয়াছেন যে তিনি প্রত্যাত দেখিতেন যে সকালবেলা ৮টা হইতে ৯টা পবান্ত চিন্তারঙ্গন ক্রমাগত চেক্ট কাটিতেন। কৌতুহলী হইয়া অনুসন্ধানে জানিতে পারেন যে এই সকল চেক ভারতবামের সর্বত্র প্রেরিত হইতেছে—মান্দ্রাজ, বোম্বাই, উত্তর-পশ্চিমাঞ্চল, মেঙ্গাল, বাংলা, পাঞ্জাব, কোথায়ও বাদ নাই। কাহারও রেলভাড়া আবশ্যিক, কাঠারও খণ্ড পরিশোধ না হইলে আর উপায় নাই, কাহারও দুঃস্থ সংসার কোনোরূপে চলে না, কাহারও পরীক্ষার ফি, কাহারও বা স্কুল-কলেজের বেতন চাই, কেহ বা অন্তৃ কল্যাণ বিদ্যালয়ে বিব্রত, কোথায়ও বা স্কুল বা লাইব্রেরীর জন্য আগের প্রয়োজন এইরূপভাবে নানাবিধ প্রার্থনা তাহাকে নিরন্তর পুরণ করিতে হইত।

গোবিন্দবাবু আশচর্যাপূর্ণ হইয়া তাহাকে জিজ্ঞাসা করেন, “আচ্ছা এই যে অসংখ্য প্রাণী আপনার নিকট হইতে অর্থ লইতেছে, ইতারা কি সকলেই সাধু ? আমার বিশ্বাস আপনার উদারতার প্রশংস্য লইয়া কত লোক আপনাকে ঠকাইতেছে।” চিন্তারঙ্গন তাসিয়া বলেন, “আমি জানি তাহার মধ্যে কতলোক

(ক)-চিহ্নিত গল্পটি ডুমরাওন রাজের প্রাইভেট সেক্রেটারী শ্রীযুক্ত গোবিন্দবাবু মুখোপাধ্যায়ের নিকট হইতে মেথক-কর্তৃক সংগৃহীত।

ঠকাইয়া লইতেছে, কিন্তু ইহাও সত্য বেশীর ভাগ লোক প্রকৃত অভাবগ্রস্ত। সে বিষয়ে আমার সন্দেহ নাই। আমি যদি প্রত্যেক ক্ষেত্রে দানের উপযুক্ত পাত্র বাচাই করিতে বসি, তাহা হইলে আমার দান করা চলে না।” এইরূপ মহতী বাণী আমি জীবনে কখনও শুনি নাই।

(খ)

একদিন প্রভাতে ইন্দুবাবু^{*} একটি মক্কেল লইয়া চিন্ত্রঞ্জনের ভবানীপুরের বাড়ীতে গিয়া দেখিলেন যে তখন চিন্ত্রঞ্জন নৌচে নামেন নাই। সহুরই আসিবেন শুনিয়া তিনি তাঁহার অপেক্ষায় বসিয়া রাখিলেন। কিছুক্ষণ পরে তিনি আসিলেন। মোকদ্দমা-সংক্রান্ত কিছু কথাবার্তা চলিতে লাগিল। এই ঘরের প্রাণে একটি বিধবা বসিয়াছিলেন। সেদিকে তাঁহার দৃষ্টিপাত হইলে, তিনি তাঁহার মোহরারকে জিঙ্গাসা করিলেন, “উনি কি চান ?” মোহরার বলিল, “উনি আপনাকে বলিবেন।” চিন্ত্রঞ্জন তাঁহাকে নিকটে ডাকিয়া বলিলেন, “আপনি কি চান ?”

রমণী—“দেখুন, আপনার নাম শুনিয়া রাণাঘাটের নিকট একটি ক্ষুদ্র গ্রাম হইতে আমি আসিয়াছি। শিয়ালদহ টেশন হইতে একেবারে বরাবর আপনার বাড়ীতে আসিয়াছি। আমি বড়ই বিপন্ন। আমার আত্মীয়-স্বজন কেহ নাই। আমার একটীমাত্র কন্যা। পাত্র স্থির হইয়াছে, বিবাহের দিনও

(খ) চিহ্নিতটি হাইকোর্টের বেঁক ক্লার্ক শ্রীযুক্ত ইন্দুভূষণ* বহু মহাশয়ের নিকট হইতে স্বেচ্ছ-কর্তৃক সংগৃহীত।

সংক্ষেপ। অন্ততঃ পক্ষে হাজার টাকা না হইলে পচন্দমত পাত্রটি হাতছাড়া হয়। কিন্তু টাকা কোথায়, আমি একেবারে নিরূপায়।”

চিত্তরঞ্জন—“বাদি একটি বিষয়ে আপনি মত করেন, তাহা হইলে এ সাহায্য করিতে আমি প্রস্তুত আছি।”

রমণী—“কি ?”

চিত্তরঞ্জন—“যখন আপনার আত্মীয়-সজন কেহ নাই তখন আমার লোক গিয়া বিবাহ দিয়া আসিবে, যাতা বায় হয়, তাহার ভার আমার উপর রাখিল।”

রমণী সান্ত্বনেত্রে তাঁহার পদতলে পড়িলেন। চিত্তরঞ্জন কুষ্ঠিতভাবে বলিয়া উঠিলেন “কি করেন ? কি করেন ?” এই বলিয়া অব্রিতভাবে তাঁহার পদযুগল সরাটিয়া লাইলেন।

বলা বাতলা, চিত্তরঞ্জন কগামত নিজের লোক পার্টাইয়া বিবাহের সকল বন্দোবস্ত ও বাবস্থা করিলেন। সুশৃঙ্খলে বিবাহ-কার্য সম্পন্ন হইল। ইহাত তাঁহার দুই সহস্রেরও অধিক টাকা বায় করিতে হয়।

আশানৱ ন চট্টোপাধ্যায়।

(৬)

চিত্তরঞ্জন ভবানীপুরের এল. এম. এস. ইনসিটিউশনে শিক্ষারস্ত করেন। এই স্টান্ডেট বর্ণ-পরিচয় হইতে আরস্ত করিয়া এণ্ট্রান্স পাশ করেন। ইংরাজ কবি ওয়ার্ডস-ওয়ার্থ বলিয়াছেন—
Child is father of the man. ছেলেবেলা হইতেই চিত্তরঞ্জনের মহস্তের আভাস পাওয়া গিয়াছিল। তাঁহার বর্ণ-

পরিচয়ের শিক্ষক আজও জীবিত। তাঁহার মুখে চিত্তরঞ্জনের বালাজীবনের কয়েকটি ঘটনা শুনিয়া বড়ই তত্ত্বিলাভ করিয়াছি। একটী ঘটনার এই স্থানে উল্লেখ করিব।

তখন চিত্তরঞ্জনের বয়স সাত কিংবা আট বৎসর। জলখাবারের জন্য তাঁহার পিতার নিকট চিত্তরঞ্জন চারিটী পয়সা পাইতেন ও প্রায় প্রত্যেক দিন সেই পয়সা হইতে অন্যান্য বালকদের খাওয়াইতেন ও নিজেও খাইতেন। একদিন তিনি বাড়ী ফিরিয়া গেলে তাঁহার পিতা পুলের শুক্ষমুখ দেখিয়া কারণ জিজ্ঞাসা করিলেন। খানিকক্ষণ চুপ করিয়া থাকিবার পর বালক চিত্তরঞ্জন বলিলেন, সেইদিন একটী অতি গরীব বালক তাত না খাইয়া স্কুলে আসিয়াছিল। সেইজন্য তিনি নিজে না খাইয়া তাহাকে চার পয়সার জলখাবার খাওয়াইয়া-ছিলেন। চিত্তরঞ্জনের পিতা পুলের এই স্বার্থত্বাগের বিষয় শুনিয়া তাঁহাকে কোলে টানিয়া লইয়া কত আদর করিলেন। বাল্যকালে এই প্রকার স্বত্বাবের পরিচয় যিনি দিয়াছিলেন, তিনি বড় হইলে যে মহাপ্রাণ হইবেন তাহাতে আর আশচর্যা কি !

শ্রীমুধীরকুমার চট্টোপাধ্যায় :

পঞ্চম পরিচ্ছেদ

একাগ্রতা

১৯১৯ খ্রীষ্টাব্দের জুন মাস—একদিন চিত্তরঞ্জন আমাকে
জিজ্ঞাসা করিলেন, পরদিন রবিবারে আমার কোনও বিশেষ কাজ
আছে কি না। কাজ থাকিলেও আমি জানাইলাম যে, প্রয়োজন
হইলে আমি আসিতে পারিব। প্রসন্নমুখে তিনি বলিলেন
যে, দ্বিপ্রভৱে নিরালায় তিনি তাঁহার রচিত কাব্য পড়িয়া আমাকে
শুনাইবেন।

পরদিন বৎসরময়ে আসিয়া দেখিলাম, তিনি বাহিরের ঘরে
একা বসিয়া আছেন। ধূমপান চিত্তরঞ্জনের একটা প্রধান বিলাস
ছিল। ধূমপান শেষ হইলে তিনি ‘কিশোর-কিশোরী’ ও
'অন্তর্যামী' আনাইলেন। এই দুইখানি তাঁহার শেষের দিকের
রচনা। স্তুক মধ্যাক্তে কক্ষমধো মাত্র আমরা দৃষ্টি জন। চিত্তরঞ্জন
ভৃত্যকে বলিয়া দিয়াছিলেন, তাঁহার কাছে কেতে কোন কার্যে
আসিলে যেন অন্য ঘরে অপেক্ষা করেন।

কাব্যপাঠ চলিল। তাঁহার আবর্ণিত ভঙ্গী অত্যন্ত সুন্দর—
কণ্ঠস্বর সুমধুর। কবি আপনার রচনা পড়িতে পড়িতে যেন
অন্যলোকে প্রয়াণ করিলেন; আমিও তন্মুখ হইয়া শুনিতে
লাগিলাম। পূর্বে অনেকবার তাঁহার কাব্য শুনি পড়িয়াছিলাম;
কিন্তু সে দিন তাঁহার কণ্ঠে যে স্তরের বক্ষার ও ভাবের প্রবাহ
উচ্ছ্বসিত হইয়া উঠিয়াছিল, তাহা চিরদিন আমার স্মরণ থাকিবে।

‘কিশোর-কিশোরী’ ও ‘অন্তর্যামী’ পূর্বে আমার খুবই ভাল লাগিয়াছিল ; কিন্তু সে দিন বোধ হইয়াছিল, ভক্ত সাধক ব্যতীত অন্যের লেখনী হইতে এমন পৌরুষধারা নির্গত হইতে পারে না ।

সন্ধ্যার অঙ্ককার ঘনাটিয়া আসিবার পূর্বেই বই দুইখানি সমাপ্ত হইল । কবি চিত্তরঞ্জনের সৌম্য আনন, প্রতিভা-দীপ্ত ললাট ও শান্ত নয়নে সে দিন যে পরিত্পু শান্তির আলো দেখিয়াছিলাম, তাহা কখনও ভুলিব না । ভাবের আতিশয়ে মাঝে মাঝে তাঁহার কণ্ঠ ভারাক্রান্ত হইয়া উঠিয়াছিল । তখনই বুঝিয়াছিলাম, তিনি যে সতোর সন্ধানে ঘূরিতেছিলেন, তাহার শুধু সন্ধানই পান নাই, জীবনে তিনি সে সতোর উপলক্ষ করিয়াছেন । বৈমণ্ড চিত্তরঞ্জন চঙ্গিদাসের মতই চির-ভাস্তৱ, নিতা প্রেম ও আনন্দময় রাজোর প্রেমিক সন্মাটের সান্নিধ্য লাভ করিয়া পবিত্র হইয়াছেন ।

ভৃত্য অভ্যাসমত মাঝে মাঝে কলিকা বদ্লাইয়া দিয়া যাইতেছিল ; কিন্তু তাত্কৃটসেবনানুরাগী চিত্তরঞ্জনের সে দিকে খেয়ালই ছিল না । প্রকৃত কবি, ভক্ত ও প্রেমিক না হইলে এমন বাহচেতনাশূন্য হওয়া যায় না । তখন তাঁহার কাছে বোধ হয় সংসারের আর সকল বিষয়ই লুপ্ত হইয়া গিয়াছিল । তিনি যখনই যাহা করিতেন, এমনই আত্মবিস্মৃত হইয়া কায়মনঃপ্রাণে তাহাতে নিমগ্ন হইয়া যাইতেন । চার্টদিকে দৃষ্টি রাখিয়া, লাভ-লোকসান খতাইয়া সাধারণ মানুষের মত কোন কাজই তিনি করিতে পারিতেন না । এইখানেই তাঁহার বিরাট বৈশিষ্ট্য ।

আসরোজনাথ ঘোষ ।

ষষ্ঠ পরিচ্ছেদ

উৎসাহ ও একাগ্রতা

আমি তখন চাঁদপুরে। তথায় তখন প্রবল আন্দোলন ও চাঞ্চল্য। ষ্টোমারের কর্মচারীদিগের ধর্মঘট চলিতেছে। চা-বাগানের কুলীদের উপর অনাচার অনুষ্ঠিত হইয়াছে, তাহার আধা বিচার করিতে হইবে, নতুন কর্মচারারা কাজে ফিরিয়া যাইবেন না; এই সংবাদ দেশবন্ধুর নিকট প্রেরিত হইয়াছে। চা-বাগানের কুলীদের বেদনার করণ কাঠিন্য দেশবন্ধুর মনকে বিচলিত করিয়া তুলিয়াছিল। তিনি স্বয়ং ঘটনাস্থলে আসিবেন বলিয়া জানাইলেন। আমরা কিন্তু এই সংবাদে চিন্তিত হইয়া পড়িলাম।

তখন ঘোর বর্ষা। পদ্মাবক্ষে উভালত্রঙ্গালা তাঙ্গন নৃতা করিতেছে। সচরাচর যে ষ্টোমারগুলি গোয়ালেন্দ তত্ত্বে চাঁদপুর যাতায়াত করে, সেগুলি এমন দিনে আনেক সময় বিপদে পড়ে শুনা গিয়াছিল। তাহার উপরে এই ধর্মঘটের দিনে ষ্টোমারের অভাবে দেশীয় ক্ষুদ্র নৌকায় আসা যে ক্ষতির বিপজ্জনক,— জীবনকে কত তুচ্ছ ভাবিলে যে এইরূপ বিপদের আলিঙ্গন করা যায়, বর্ষায় পদ্মার রুদ্র মৃত্তি যে দর্শন করিয়াছে, সেই তাঁতা বুঝিতে পারে। কিন্তু কোন বিপদ, কোন ভয় দেশবন্ধুকে ধরিয়া রাখিতে পারিল না। আনেক বন্ধুবান্ধব তাঁতাকে বুকাইয়াছিলেন,— “হই এক দিন অপেক্ষা করুন।”

বন্ধুবন্ধুবের শত অনুরোধ উপরোধ উপেক্ষা করিয়া, জীবনের সমস্ত ভয়-ভাবনা ত্যাগ করিয়া দেশবন্ধু সামান্য একখানি নৌকায় আরোহণ করিয়া চাঁদপুরাভিমুখে যাত্রা করিলেন। আমরা সকলে উদ্বিঘাটিতে চাঁদপুরে তাঁহার আগমন প্রতীক্ষা করিতে লাগিলাম। তিনি যে দিন ক্লান্তদেহে চাঁদপুরে আসিয়া উঠিলেন, সে দিন সকলেই স্বস্তির নিশাস ফেলিলাম। দরিদ্র-নায়ায়ণের সেবার জন্য তাঁহার এতটা উৎসাহ, এতটা একাগ্রতা দেখিয়া শ্রদ্ধায়, ভক্তিতে সে দিন তাঁহার চরণে হৃদয় লুটাইয়া দিয়াছিলাম।

শ্রীযুক্তীজ্ঞমোহন সেনগুপ্ত।

সপ্তম পরিচ্ছেদ

ত্যাগ ও অনাসক্তি

যখন দেশবন্ধু বৎসরে লক্ষ লক্ষ টাকা আয় ও বাবসায়ে
অতুল প্রতিপক্ষি হেলায় বিসজ্জন দিয়া পথে ঢাঢ়াইলেন, তখন
লোকে বিশ্ময়ে অবাক হইয়া বলিল — “কি ত্যাগ !” বাস্তুবিক
বর্তমানকালে এতখানি টাকার মায়া এ দেশে বা অন্য দেশে এত
সহজে কেহ ঢাঢ়িতে পারিয়াছেন কি না, জানি না — অন্ততঃ
মনে ত পড়ে না। কিন্তু তব আগি এ কথা পূর্বে বলিয়াছি এবং
এখনও বলিতেছি যে, যিক ত্যাগ বলিলে দেশবন্ধুর মহৱের স্ফূর্তি
আমরা বুঝিতে পারিব না।

যাহা কামা, ঈপ্সিত, বাঞ্ছনায়, মাতা বাসনা ও সাধনার
সামগ্রী, তাহার ত্যাগট ত্যাগ এবং সাধারণতঃ আমরা এমনট
টাকার কাঙাল যে, সেই জন্য টাকার ত্যাগট একমাত্র ত্যাগ
বলিয়া মনে করি। ইহা কেবল আমাদের সন্দয়ের দৈত্য ও
সঙ্কীর্ণতার পরিচায়ক। আর কিছুই নহে। কিন্তু এই স্থানেট
চিল দেশবন্ধুর বৈশিষ্ট্য। তিনি টাকার দিকে কখন দৃক্পাত
পর্যান্তও করেন নাই। অজস্র টাকা উপার্জন করিয়াছেন সত্তা —
কিন্তু সে টাকাকে কখনও বলিমুষ্টির অপেক্ষা মূলোবান জ্ঞান
করেন নাই — টাকার উপর তাহার কোনও দিন একটা দুরদ
বসে নাই। ইহা সকলের পক্ষেই গৌরবের কথা — দেশবন্ধুর

পক্ষে আরও গোরবের কথা। কারণ, সচরাচর দেখা যায় যে, ঘাঁহারা দারিদ্র্যের সহিত ভৌষণ সংগ্রাম করিয়া ঐশ্বর্যে উপনীত হইয়াছেন, টাকাটা তাঁহাদের কাছে বেশী বড় হইয়া দাঢ়ায়।

দেশবন্ধু দারিদ্রের সন্তান বা দারিদ্র্যে পালিত, এ কথা কেহ বলিতে পারেন না। কিন্তু নানা কারণে তাঁহাকে ঘোর অবস্থা-বিপর্যয়ের মধ্য দিয়া যাইতে হইয়াছিল। তিনি এক দিন আমাদের কাছে গল্প করিয়াছিলেন যে, ব্যবসায়ের প্রথম প্রথম হাইকোর্টের পর তিনি ইঁটিয়া ভবানীপুরের বাসা পর্যন্ত যাইতেন—ব্যায়ামের জন্য নহে, ট্রামের ছয় পয়সা ভাড়া বাঁচাইবার জন্য। এমন ভৌষণ দারিদ্র্যের অবস্থা কাটাইয়া যিনি মাসে পঞ্চাশ হাজার টাকা রোজগার করিয়া গিয়াছেন, তাঁহার পক্ষে টাকার মায়া করা স্বাভাবিক—কিন্তু দেশবন্ধুর কোন দিন তাহা হয় নাই।

অনেকে লক্ষ্য করিয়া থাকিবেন, দেশবন্ধু সহজে টাকা স্পর্শ করিতে চাহিতেন না। খুলনায় মামলা করিতে গিয়াছেন—এক-সঙ্গে পঁচিশ হাজার টাকা দেওয়া হইল। কিন্তু এত টাকার দিকে একবার ফিরিয়াও তাকাইলেন না। বেণী খানসামা টাকা গণিয়া লইল, তাহার কাছেই টাকা এবং টাকার বাস্ত্রের চাবি রহিল—দেশবন্ধু তাহার খোঁজও করিলেন না। একবার দুইবার নহে, বহুবার এই ব্যাপার প্রত্যক্ষ করিয়াছি।

তাই বলিতেছিলাম, যে লোকের নিকট টাকা এতটা তুচ্ছ ও অসার বলিয়া পরিগণিত হইত, তাঁহার পক্ষে টাকার ত্যাগটাই বড় ত্যাগ বলিয়া মনে করিলে মানুষটিকে ভুল বুঝা হইবে—



কবি চিত্তরঞ্জন



ଡୁମରୀଙ୍କ ରାଜେନ ମାମଲାର ମହିଦେ (୧୯୧୨ ଖୋଟାନ୍ତରେ)

তাঁহার মহস্তের অবমাননা করা হইবে। বহু দিনের অভ্যন্তরে নেশার সামগ্ৰীগুলি তিনি যে এক মৃহৃত্তে জাড়িয়া দিলেন, আৱ জীবনে এক দিনের তৰেও স্পৰ্শ কৱিলেন না— আমাৰ মনে হয়, টাকার অপেক্ষা ইহাই দেশবন্ধুৰ পক্ষে বড় তাগ ; আৱ দেশবন্ধুও সেইৱপ অনুভব কৱিতেন। বারিষ্টারী সম্বন্ধেও সেই কথা। বাবসায়ের এত বড় আয় জাড়িয়া দিয়াছি, এ কথা কথনও তাঁহার মনে আসিত কি না, জানি না ; কিন্তু বারিষ্টারীতে তাঁহার যে অতুল বশ, প্ৰতিপত্তি ও প্ৰভুত্ব ছিল, এক মৃহৃত্তে তাহাকে অবহেলায় প্ৰতাখ্যান কৱা বাস্তবিকই তাঁহার পক্ষে টাকার অপেক্ষা বড় তাগেৰ বাপার।

এক দিনেৰ কথা বেশ মনে পড়িতেছে। রাজদোহেৰ জন্ম ‘অমৃতবাজার পত্ৰিকাৰ’ বিৱৰণে গভৰ্ণমেণ্ট মামলা কৱিয়াছেন। জ্যাক্সন, নটন, চক্ৰবৰ্তী প্ৰভৃতি বড় বড় ব্যারিষ্টার ‘অমৃত-বাজারেৰ’ পক্ষ হইয়া লড়িলেন, কিন্তু কেহই কিছু কৱিতে পারিলেন বলিয়া মনে তটিল না। চাক জষ্ঠিসেৱ ঘৰ বড় বড় উকীল, ব্যারিষ্টার, এটৰ্নি পৰিপূৰ্ণ, তিলধাৰণেৰ স্থান নাই। সকলেই উদ্গ্ৰীব হইয়া শুনিতেছেন—সকলেই ভাবিতেছেন, জজেদেৱ মনে কোনও ইম্প্ৰেসন তয় নাই (দাগ বসে নাই), বৱং উল্টা উৎপত্তি হইয়াছে। মিন্টাৰ জ্যাক্সন রাগ কৱিয়া চীক জষ্ঠিস্কে দুই একটা কড়া কড়া কথা শুনাইয়া দিয়া চলিয়া গেলেন। সকলেই মনে কৱিলেন, মোকদ্দমাৰ দফা শেষ হইল।

অবশেষে চিত্ৰঞ্জন উঠিলেন ; লোক চিৰাপৰ্তি, মন্ত্ৰমুখেৰ

মত তাঁহার কথা শুনিতে লাগিল ; অপূর্ব কৌশলের সহিত তিনি সরকারপক্ষের মামলা বিশ্লেষণ করিয়া তাহার অসারতা প্রতিপন্থ করিতে লাগিলেন ; মোকদ্দমার চেহারা বদ্লাইয়া গেল ; একটা গভীর ধন্যবাদে লোকের অন্তঃকরণ পূর্ণ হইয়া উঠিল। দুইটার সময় জজেরা উঠিয়া গেলেন, চিন্তরঞ্জন বাহিরে আসিলেন। চীফ জষ্টিসের কাছারীঘর হইতে বার লাইব্রেরী পর্যন্ত সমস্ত বারান্দায় লোকের ভিড় লাগিয়া রহিয়াছে। লোক সমন্বয়ে দুই দিকে কাতার দিয়া দাঁড়াইয়া মধ্যে পথ করিয়া দিল, বিজয়ী বীরের মত তিনি চলিয়া আসিলেন। স্বতরাং তাঁহার পক্ষে ব্যারিষ্টারী-জীবনের এই যে বিজয়োল্লাসের গর্ব, এই যে প্রচুর ও প্রতৃত সম্মান ও গৌরব, ইহা ছাড়িয়া আসিতে বাস্তবিকই কিছু ক্লেশ হইয়া থাকিতে পারে — টাকা ছাড়িতে কিছুমাত্র হয় নাই।

স্বীকার করি যে, এই সম্মান ও গৌরবের লক্ষ গুণ প্রতিদান তিনি পরে দেশবাসীর নিকট পাইয়াছিলেন। কিন্তু পাইব বলিয়া ত ছাড়েন নাই—ছাড়িয়াছিলেন নিজের চিন্তের একটা অসাধারণ প্রাচুর্য ও বিশালতা ছিল বলিয়া। কিছু রাখিয়া ঢাকিয়া করিতে দেশবন্ধু জানিতেন না—নিজেকে নিঃশেষে বিতরণ করিয়া দেওয়া ছিল তাঁহার স্বত্বাবের ধর্ম। নিজের জন্য কিছু পুঁজি রাখিয়া তিনি কোন কাজে লাগিতে পারিতেন না—একেবারে পুঁজি শেষ করিয়া লাগিয়া যাইতেন। কংগ্রেস হউক, কাউন্সিল হউক, মোকদ্দমা হউক, কোন কাজেই দুই আনা হাতে রাখিয়া চোদ্দ আনা কাজে লাগাইয়া তিনি সন্তুষ্ট

হইতে পারিতেন না। যোগ আনন্দ ছাড়াইয়া আঠার আনন্দ দিতে
পারিলে, তাহার চিত্তের বিশালতা যেন ভরিয়া উঠিত না—
অন্তরে যেন অপূর্ণতা থাকিয়া যাইত। এই যে নিজেকে নিঃশেষে
বিতরণ—সমগ্র আত্মা ও মনের অকুণ্ঠিত ও অবারিত দান—
ইহাই ছিল চিন্ত-চরিত্রের বৈশিষ্ট্য। টাকার দানটা ইহারই একটা
অকিঞ্চিত্কর প্রকারভেদমাত্র।

আজিতেন্দ্রলাল বন্দোপাধ্যায়।

অষ্টম পরিচ্ছন্দ

উদারতা ও ভালবাসা

(১)

তাঁহার উদারতা কথায় বলিয়া বুঝাইতে পারিব না, এ অনুভবের জিনিষ। একদিন জেলখানায় অস্ত্রস্থ হইয়া বিজ্ঞানায় শুইয়া আছেন, আমি কাছে বসিয়া আছি, এমন সময়ে বাহিরের একটী ভদ্রলোক দেখিতে আসিলেন। ভদ্রলোকটী কি একটা হিসাব দেখাইয়া বলিলেন, “আমি একটা হিসাব এনেছি, হিসাবটা একবার দেখবেন না ?” তিনি উত্তর করেন “হিসাব আর কি দেখবো, আমার মনে হয়, আমি যা দিয়েছি, তুমি তার চেয়ে বেশী করেছ”। এই তাঁহার মহানুভবতা, অথচ আমরা শুনিয়াছিলাম সেই ভদ্রলোকটীর হাত দিয়া অনেক টাকার আদান-প্রদান হইয়াছিল।

বাস্তবিক টাকার সম্বন্ধে তাঁহার কথনও কোন হিসাব ছিল না। একদিন কথাচ্ছলে বলিলেন, অমুক আসিয়া দুই তিন দিন বলিল, “পৈত্রিক বাড়ীখানি নিলাম হয়ে যাবে, তাই চিন্ত, এই টাকাটা দিয়ে তুমি বাড়ীখানি রক্ষা কর।” তাই আমি ২৫০০০, পঁচিশ হাজার টাকার একখানি চেক দিয়াছিলাম।

মাসিক সাহায্য তিনি কত লোককে করিতেন তাহার ইয়ত্তা নাই। প্রাক্টিস ছাড়িবার পরেও দুই তিনমাস সেই সমস্ত টাকা দিয়াছিলেন। আমি যতদূর জানি এই সমস্ত লোকের মধ্যে একজন ভদ্রলোক ১৫০ পাইতেন, আর একজন মাসিক ৭৫ পাইতেন। ঢাকায় অবস্থানকালে খণ করিতেন, তথাপি কাহাকেও প্রত্যাখ্যান করিতেন না।

আহেমেন্দ্রনাথ দাশগুপ্ত।

(২)

আমি তাঁর প্রায় সমবয়সী ছিলাম, তিনি ছিলেন বড়ৰ কয়েকের বড়। সাতিতা, তা ঢাঢ়া আৱো অনেক বিষয়ে তিনি আমাৰ সঙ্গে আলোচনা কৰতেন।

তাঁৰ চৰিত্ৰে আৱো বিবিধ বৈশিষ্ট্যের মধ্যে সবচেয়ে বড় দুটো জিনিষ আমি দেখেছি। অৰ্থের সম্বন্ধে তাঁৰ কোনও মোহ ছিল না,—মনে তাঁৰ ভয়ানক বৈৱাগ্য ছিল—হৃপাত্রে, অপাত্রে, কুপাত্রে, তিনি অজস্র দান কৰে গেছেন।

আৱ একটী বড় জিনিস, দেশেৰ প্রতি তাঁৰ সতিকাৰ দৰদ ছিল, বাস্তুবিকই তিনি দেশকে বড় ভালবেসেছিলেন। মাৰে মাৰে তিনি বলতেন, আমাৰ মত বুকেৰ মধ্যে জালা না হ'লে লোকেৰ মধ্যে কাজ কৰতে পাৰবেন না।

বাংলাদেশেৰ লোকেৰ প্রতি তাঁৰ অফুৱন্ত স্নেহ, অনন্ত বিশ্বাস ছিল। কংগ্ৰেসেৰ কাজে দেশেৰ লোক টাকা দেয় না বলে একবাৰ তাঁৰ কাছে অনুযোগ কৰি, তাতে তিনি বলেছিলেন,

দেশের লোক টাকা দেয় না ! অজস্র টাকা দেয় ! কেবল
আমরা চাইতে জানি না । আপনি কি বলেন দেশের লোক
আমাদের ভালবাসে না ?

দেশের লোকে তাঁকে ভালবাসে, তাঁকে সাহায্য করবে এ
তাঁর অটল বিশ্বাস ছিল । সবচেয়ে বড় জিনিস তাঁর মধ্যে যা'
আমি লক্ষ্য করেছিলাম, তা' হচ্ছে এই—দেশের লোকের প্রতি
তাঁর অন্তুত স্নেহ, অপূর্ব ভালবাসা ।

শ্রীশ্রংচন্দ্র চট্টোপাধ্যায় ।

ନବମ ପରିଚେଦ

ସଂୟମ-ଅଭ୍ୟାସ

(୧)

ଡୁମ୍ରାଓନ କେସ ଲାଇଁ ଚିତ୍ତରଙ୍ଗନ ତଥନ ~~ପ୍ରଯୋଗ~~ ଚାପ୍ରାୟ
ଥାକିତେନ । ଆମାର ଏକବାର ମେଥାନେ ଯାଇବାର କଥା ହଇଲ ।
କି କାରଣେ ଯାଓୟା ହଇଲ ନା ମନେ ନାହିଁ । ବ୍ରେଣ୍ ଫିଭାର
ହୋଯାତେ ଚିତ୍ତରଙ୍ଗନ କଲିକାତାଯ ଆସିଲେନ । ଆମରା ଗେଲେ
ଆମାଦେର ଏକେବାରେ ନିଜେର ଶୋଯାର ସରେ ଡାକିଯା ବିଚାନାୟ
ବସିତେ ବଲିଲେନ । ଦେଉସରେର ନିକଟ ରିଖିଯା ଗ୍ରାମେ ଚିତ୍ତରଙ୍ଗନ
ବଳ ସହ୍ୱର୍ଦ୍ଦ ବିଷା ଜମି ବନ୍ଦୋବସ୍ତୁ ଲାଇଁଛିଲେନ । ମେଥାନେ
ଏକଟା ଆଶ୍ରମଗୋଚର କିଛୁ କରା ଯାଏ କିନା ଏବଂ ଆମି
ତାହାର ଭାର ଲାଇତେ ପାରି କିନା ଜିଜ୍ଞାସା କରିଲେନ । ଠିକ
ହଇଲ, ଆମରା ଦେଉସର ଯାଇବ ଏବଂ ସ୍ଥାନଟା ଦେଖିଯା ଆସିଯା ଶ୍ଵର
କରିବ । କୟେକ ମାସ ପରେ ଯାଓୟା ହଇୟାଛିଲ ।

ଏଦିନ ଚିତ୍ତରଙ୍ଗନ ଆମାଦେର ବଲିତେଛିଲେନ, “ଦେଖ, ପ୍ରାକଟିସ୍
କରିତେ ଗେଲେ ଦେଶେର କାଜ କରା ଚଲେ ନା । ଏ ବଢ଼ର ପାଁଚ ଲାଖ
ଟାକା ରୋଜଗାର କରିଲାମ, କିନ୍ତୁ ଏକଟା ପଯସା ଥାକେ ନା ; ଦେଶେର
କାଜ ତେମନ କିଛୁଇ କରିତେ ପାରିଲାମ ନା । ଆମାର କତକ ଗୁଲୋ

দেনা রয়েছে, এ গুলো শোধ হ'য়ে গেলেই ব্যবসা ছেড়ে সম্পূর্ণভাবে দেশের কাজে লাগবো। কিন্তু বছরের পর বছর যাচ্ছে ঝণ আমার বেড়েই চলেছে। নিজের জন্য ভাবি না—কষ্ট কি, প্রথম জীবনেই দেখেছি। ট্রামের ভাড়া বাঁচাবার জন্যে হাইকোর্ট থেকে বিকেলে ফেরবার সময় হেঁটে এসেছি এবং এমন দিনও গেছে যেদিন হয়তো দুই আনা বই পরিবারের সম্বল ছিল না। আর যদি দশ বছরও বাঁচি, প্র্যাকটিস্ ছাড়লেও একরকম ক'রে স্থুখে দুঃখে যাবে, কিন্তু একটা কেবল ভাবনা হয়, অনেকগুলো লোক আমার কাছে মাসিক সাহায্য পায়; সে বেচারাদের কি হবে? যাই হোক, এত না ভেবে ঝাঁপিয়ে না পড়লে হবে না। তোমরা এ সম্বন্ধে কি বল?”

আমরা উত্তর করিলাম, “অন্যকর্ম্মা হ'য়ে দেশসেবায় না নাম্বলে দেশের বিশেষ কিছু করা যাবে না।”

মিউনিশন বোর্ডের কেস ও ডুমুরাওন কেস করিতে তিনি প্রতিশ্রুত ছিলেন, কিন্তু দেশের কাজ হইয়া উঠিবে না বলিয়া তিনি এগুলিও ছাড়িয়া দিতে চাহিয়াছিলেন। পুলিশের অন্তর্মনে কর্তা আম্প্রেং সাহেবের জিদে মিউনিশন বোর্ডের মামলা চিত্রঞ্জনের হাতে আসে; কারণ অন্য কোনও ব্যারিষ্টারের উপর গভর্নমেন্টেরও এত বিশ্বাস ছিল না।

এই মামলার কাগজপত্র দেখিবার ‘ফ’ তিনি ৫০ হাজার টাকা পাইয়াছিলেন। যে দিন এই মামলা ফেরৎ দেওয়ার কথা হয়, তখন আমি ঘরে বসিয়াছিলাম। গবর্নমেন্ট পক্ষ হইতে বোধ হয় ডিরেক্টর অব ইন্ডাস্ট্রীস্ মীক্ সাহেব আসিয়াছিলেন।

মামলাটি হাতে রাখিবার জন্য, তিনি কত অনুরোধ করিলেন। চিত্তরঞ্জন হাসিতে হাসিতে বলিলেন,—“আট লাখ টাকা দিয়া গবর্ণমেণ্ট আমার বাঁধিয়া রাখিতে চান, এতে তো গবর্ণমেণ্টের মহা লাভ। আপনারা অন্য ব্যারিষ্টারের চেষ্টা দেখুন, না পাইলে অবশ্য আমি তো প্রতিজ্ঞাবন্ধ আছিই, কিন্তু আমাকে পরিত্রাণ দেওয়ার যথাসাধ্য চেষ্টা করিবেন।” আমার যতদূর মনে আছে, তিনি সবশুক্র প্রায় ঘোল লাখ টাকার ত্রিফ্ৰেঙ্ দিয়াছিলেন। নিজের ঘাড়ে এত দেনা থাকিতে শুধু দেশের সেৱাৰ অবসর কৱিতে তিনি টাকার দিক দিয়া কি বিপুল তাগই না কৱিয়াছিলেন!

তিনি টাকাকে অপদেবতা বলিতেন! একদিন সিলেটের অন্তর্গত শ্রীমঙ্গল ষ্টেশনে তিনি আধুলি, সিকি, দুয়ানিৰ চেহারা লইয়া কত না কৌতুহল দেখাইয়াছিলেন এবং শ্রীমতা বাসন্তী দেবীকে ডাকিয়া দেখাইয়াছিলেন আজ কাল এই সকল মুদ্রার চেহারা কিৰূপ হইয়া গিয়াছে। চিত্তরঞ্জন ও বাসন্তী দেবীৰ সেইদিন বাল-স্তুতি কৌতুহল দেখিয়া আগি অবাক হইয়াছিলাম।

চিত্তরঞ্জন বলিতেন “লোকে আমার প্র্যাকটিস্ ত্যাগের প্রশংসা কৰে, কিন্তু প্র্যাকটিস্ ত্যাগ কৱিতে আমার বিন্দুমাত্ৰ কষ্ট হয় নাই, এতদিনেৰ এত অভ্যাস একটা ছাড়িতেও আমার তেমন কষ্ট হয় নাই, যত কষ্ট হইয়াছিল তামাক ছাড়িতে।”

প্র্যাকটিস্ ছাড়াৰ পূৰ্বে কি কি জিনিস না ছ'লে তাহার চলিবে না তাহার একটা তালিকা কৱিয়াছিলেন। তথ্যধৈ তামাক একটা প্ৰধান জিনিস ছিল। তামাক ছাড়িয়া চিত্তরঞ্জনেৰ

পেটের অবস্থা খারাপ হয়, এজন্ত তিনি কিছুকাল নিরামিষ থাইতেন। তখন তাঁহার মেজাজটা যে কি রুক্ষম হইয়াছিল আমার বেশ মনে আছে। সকল কথায় চটিয়া উঠিতেন এবং কোথাও কাহাকে তামাক থাইতে দেখিলে সত্ত্ব-নয়নে চাহিয়া মুখ ফিরাইয়া লইতেন।

শ্রীহেমন্তকুমার সরকার।

(২)

ইদানীং তিনি দেশ ছাড়া আর কিছুই ভাবিতে পারিতেন না। তিনি শেষবার কলিকাতায় আসিবার পূর্বে টালিগঞ্জে মাসিক কুড়ি টাকা ভাড়ায় একখানি খোলার ঘর নিজের জন্য ভাড়া করিতে একজন বন্ধুকে চিঠি লিখিয়াছিলেন। এই কথা শুনিয়া তাঁহার আকৈশোর বন্ধু মহাপ্রাণ এটোঁ শ্রীযুত প্রমথনাথ কর মহাশয় দুঃখ করিয়া দার্জিলিঙ্গে তাঁহাকে পত্র দেন। তিনি লেখেন যে তাঁহাকে প্রমথবাবুর বিশপ-লিফ্রয় রোডের বাড়ীতে আসিয়া থাকিতে হইবে। চিত্তরঞ্জন প্রমথবাবুকে জানান যে, তিনি এ বাড়ীতে গিয়া উঠিলে উহার সমস্ত ইংরাজ অধিবাসীরা হয়ত উঠিয়া যাইবে ও ইহাতে প্রমথবাবুর বিশেষ অর্থনাশ হইবে। কিন্তু বন্ধুপ্রাণ প্রমথবাবু দেশবন্ধুকে ছাড়িলেন না। অবশেষে দেশবন্ধুকে এ বাড়ীতেই আসিতে হইল।

তিনি ব্যারিষ্টারী ছাড়িয়া দিয়া দুধ খাইতেন না, স্বকোমল শয্যায় শয়ন করিতেন না,—জিজ্ঞাসা করিলে বলিতেন, “যাহাদের দুধ যোগাইতাম, তাহারা দুধ না খাইয়া মরিবে, আর

আমি দুধ খাইব ?” শেষ, জীবনে তিনি নৈষ্ঠিক ব্রহ্মচারী হইয়াছিলেন।

পুরাণে কথিত আছে, শ্মশানবাসী মহাদেব মৃত্যুকে জয় করিয়া অমর হইয়াছিলেন। এই স্বার্থাঙ্ক যুগে দেশবন্ধু চিন্ত্রঞ্জনও মৃত্যুকে বরণ করিয়া অমর হইয়াছেন।

শ্রীমোহিনীমোহন মুখোপাধ্যায়।

দশম পরিচ্ছেদ

অমায়িকতা ও সহস্রাবৃত্ত

তিন চারি বৎসর পূর্বে একবার দেওঁঘর যাইবার সময় যশিদি জংসনে শুনিলাম দেশবন্ধু আমাদের ট্রেণেই কলিকাতা হইতে যশিদি জংসনে নামিয়াচ্ছেন, তিনি রিখিয়া যাইবেন। বন্ধুরা আমায় সুবিধাবাদী বলেন, সুতরাং আশ্চর্য্য নয়, আমার লোভ হইবে এই স্থযোগে একবার মহাপুরুষ দর্শন করা। প্লাটফর্মে দেখিলাম, এটর্ণি শ্রীযুক্ত কুমারকুমাৰ দত্ত মহাশয়। তিনি আমাকে চিনিতেন। তাহার নিকট মনোভাব জ্ঞাপন করিতে তিনি আমাকে ঘড় করিয়া দেশবন্ধুর নিকট লইয়া গেলেন। আমি সেখানে গিয়া দেশবন্ধুর চরণধূলি মস্তকে লইলাম। দেশবন্ধু একটু বিব্রত হইয়া আমাকে হাত ধরিয়া তুলিয়া পাশে বসাইলেন। কত বড় দেবতুল্য মহাপুরুষের পাশে বসিবার সৌভাগ্য ও গৌরব আমি সেদিন লাভ করিয়াছিলাম! সেদিন প্রাণে প্রাণে বুঝিয়াছিলাম, কত উচ্চের নিকট কত নগণ্য তুচ্ছের সমাবেশ হইয়াছে। সাহস কিন্তু আমার অপ্রতুল ছিল না। দু'একটী কথা কহিবার প্রলোভন সেই সুবিধায় আমি সংবরণ করিতে পারি নাই। তাহার অমায়িকতার অন্তরালে বসিয়া আমি দু'একটী প্রশ্ন তাহাকে করিয়াছিলাম। আমি নগণ্য বলিয়া, উপেক্ষা করার পরিবর্তে, তিনি আমার প্রত্যেক কথাটী আমাকে ভাল করিয়া

বুঝাইয়া দিয়াছিলেন। পাঠকের ধৈর্যাচূড়ি না হইতে পারে মনে করিয়া, ত'একটী প্রশ্নোত্তর যথাসন্তুষ্ট স্মরণ করিয়া নিম্নে লিপিবদ্ধ করিলাম—

আমি। আপনারা সকলকে চরকা বাবহার করতে পরামর্শ দিচ্ছেন। একটী লোকে চরকা কেটে কত টাকা উপার্জন করবে যাতে তার দিন গুজরাণ হ'তে পারে ?

দেশবন্ধু। চরকা কাটা যদি কেহ উপজীবিকা ব'লে গ্রহণ করেন, তা' হ'লে মাসিক কুড়ি, পঁচিশ টাকাও হ'তে পারে।

আমি। তা' হ'লে এই মাগ্গি গন্ধার দিনে, এ সামাজিক টাকায় তাঁর চল্বে কি করে ?

দেশবন্ধু। চালায় কে জানেন ! আপনি না আমি, না ভগবান् ? যিনি যেদিন গেকে চরকা-কাটা জীবিকার্জনের পন্থা-স্বরূপ করে নেবেন, সেইদিন গেকে তাঁর বিলাসিতা-নাসনগুলি আপনা হ'তেই খসে পড়বে। শাকভাত আর মোটা কাপড় সন্তুষ্ট হ'তে পারলে আস্তদের দিন গুজরাণ হ'তে আর লাগে কি ? ততটা তাগ বাঞ্ছালী বর্তমানে করতে না পারলেও অবসর সময় অর্থাৎ যখন তাস-দাবা-পাশা নিয়ে কিংবা পরনিন্দা-পরচর্চায় অপব্যায়িত হয়, সেই সময়টুকু চরকায় অর্পণ করলে মাসিক আট, দশ টাকা উপার্জন হওয়া তো বেশী কথা নয়। নিজের মাসিক বাঁধা আয়ের উপর এই উপরি-পাওনাটুকু কত কাজের তা কি বুঝেন না ?

আমি সন্দৃষ্টিসূচক ঘাড় নাড়িলে, তিনি পুনরায় বলিতে আরম্ভ করিলেন—“লজিক, লজিক করে দেশের লোক পাগল।

এখন এই লজিককেই আমি অত্যন্ত ভয় করি। আগে কার্য্যক্ষেত্রে
না নেবে হিসাবখনটুকু আমাদের স্বভাব-সিদ্ধ, তাই লজিক ছেড়ে
দেওয়া এখন আমাদের পক্ষে কল্যাণকর। রাস্তার ধারে পেন্সিল
খেলনা বিক্রী ক'রে, আলুপটলের বাবসা থেকে আরম্ভ ক'রে
আমাদের দেশে কত মাড়োয়ারী লক্ষ্যপাত্র হয়েছেন, তাতো
আমরা চোখে দেখেও শিখি না।”

আমি বলিলাম, মাড়োয়ারীদের সঙ্গে আমাদের ব্যয়েরও যে
তুলনা হয় না। যেখানে চার পয়সার ঢাতু খাইয়া একজন
দরিদ্র মাড়োয়ারীর দিন চলিবে, সেখানে বাঙালীর অন্ততঃ
আট আনা খরচা হবেই।

দেশবন্ধু। আমিও ত তাই প্রথমে বলেছি, খরচা কমাও,
বিলাসিতা বর্জন কর; সাদাসিদে ভাবে চল, দেখ্বে আমাদেরও
দিন ফিরবে।

এই সময়ে দেশবন্ধুর গাড়ী আসিলে, আমি তাঁহাকে প্রণাম
করিয়া উঠিলাম, তিনিও হাসিমুখে আমাকে বিদায় দিলেন,
যেন আমি তাঁর কত দিনের পরিচিত !

শ্রীকৃষ্ণদাস চন্দ্র।

(১)

বোধ হয় ১৯১৭ খ্রীষ্টাব্দে বেলুড়মঠে শ্রীরামকৃষ্ণের জন্মতিথি
উৎসবেৰ স্বামী প্ৰেমানন্দ মহারাজ ঘৃত বাবদ আড়াই
শত টাকা সংগ্ৰহ কৰিতে আমাকে আদেশ কৰেন ; আমি প্ৰগমে
কোনও একজন হিন্দুধৰ্মানুবাগী স্তুপসিদ্ধ বারিষ্টারেৰ নিকট
যাই, তিনি পঞ্চাশ টাকা দিতে স্বীকৃত হইলৈন। পৱে আমি
শ্রাযুত চিত্তৱঞ্জনেৰ নিকট গিয়া বলিতেই তিনি বলেন, “কচ টাকা
তুলেছ ?” আমি বলিলাম “কোন স্তুপসিদ্ধ বারিষ্টার পঞ্চাশ টাকা
দিয়েছেন।” তিনি তৎক্ষণাৎ বলিলৈন, “তোমাৰ আৱ কোথাও
যেতে হ'বে না—বাকী দুই শত টাকা আমি দিব।” এই সংবাদ
শুনিয়া মঠেৰ স্বামীজিৱা অভ্যন্ত আনন্দিত হন এবং তাহাকে
মঠে উপস্থিত হইয়া মুহোৎসবে যোগদান কৰিতে স্বামী প্ৰেমানন্দ
মহারাজ আমাকে অনুৱোধ কৰিতে বলেন। আমি যখন প্ৰগমে
তাহাকে স্বামীজিৰে অনুৱোধ জানাই তখন তিনি বলেন,
“শুনেছি সেখানে বেজোয় ভিড় হয়। অত ভিড়ে যাওয়া
আমাৰ পোষাবে না। অন্য দিন না হয় সপৰিবাৰে গিয়ে দেখে
আস্বো—কি বল ?”

উভৱে আমি বলিয়াছিলাম, “আপনি না জনসাধাৰণেৰ সঙ্গে
মিশ্ৰতে চান—তবে ভিড় দেখে ভয় পেলে চল'বে কেন ?
যেখানে হাজাৰ হাজাৰ লোক এক ভাবেৰ প্ৰেৰণায় ও উন্মাদনায়
সম্মিলিত হয়—যে নিৰক্ষৰ মহাপুৰুষেৰ আবিৰ্ভাৱে বাংলা দেশে
পাঞ্চাত্য শিক্ষা-দীক্ষাৰ মধোও প্ৰাচীন সন্মান আদৰ্শ প্ৰতিষ্ঠা
হ'চে এবং যাঁৰ সাধনাৰ বাণী স্বামী বিবেকানন্দ বজ্র-নিৰ্ঘোষে

জগতে প্রচার ক'রেছেন—বাংলা দেশের যুবকবৃন্দকে সেবা-ধর্মে
মাতিয়েছেন—শুধু ভিড়ের ভয়ে তাঁর লীলাভূমিতে যাবেন না ?
দেশের একটা অপূর্ব ভাবের দৃশ্য দেখবেন না ? চিত্তরঞ্জন আর
দ্বিরুক্তি না করিয়া বলিলেন, “আচ্ছা—আমি যদি মেয়েদের
নিয়ে উৎসবের পূর্বদিন গিয়ে পরদিন উৎসব দেখে সন্ধ্যাকালে
চ'লে আসি, তবে আমাদের জন্য আলাদা একটা নিরিবিলি স্থানের
ব্যবস্থা কি হ'তে পারে ? তুমি মঠে স্বামীজিদের সঙ্গে পরামর্শ
ক'রে আমাকে সংবাদ দিবে।” মঠের স্বামীজিরা ও স্বামী
প্রেমানন্দজি ইহা শুনিয়া অত্যন্ত আহ্লাদিত হইলেন এবং মঠের
উত্তর পার্শ্বের যে বাগান-বাড়ী পূর্বেই মহোৎসবেোপলক্ষে তাঁহারা
ভক্তগণের থাকিবার জন্য বন্দোবস্ত করিয়াছিলেন—এক্ষণে
তাহাতে উহা শ্রীযুক্ত চিত্তরঞ্জনের থাকিবার বাবস্থা করিলেন।
আমি এই সংবাদ দিলে চিত্তরঞ্জন বলিলেন, “তবে নিশ্চয়ই যাব।”

উৎসবের পূর্বদিন সন্ধ্যাকালে বেশ এক পসলা বৃষ্টি হইতেছে
এমন সময়ে চিত্তরঞ্জন মোটরে বেলুড় মঠে আসিলেন। তাঁহার সঙ্গে
ছিল শ্রীযুত গিরিজাশঙ্কর রায়চৌধুরী, শ্রীমান् সত্যেন্দ্রকুমার গুপ্ত
ও একজন আরদালী। মঠের পার্শ্ববর্তী বাগান-বাড়ীতে তাঁহাদের
বাসস্থান নির্দিষ্ট হইল। তাঁহার কন্যার অসুস্থ বলিয়া
তিনি মেয়েদের লইয়া আসিলেন না—ইহা তিনি স্বামী প্রেমানন্দ-
জিকে বলিলেন।


দেশবন্ধু-কথা

পঞ্চ-



দেশবন্ধু ও শ্রীযুক্তা বাসন্ত দেবী

1960-1965



দেশবন্ধু-কথা

পদ্ম্যাংশ

চিত্ররঞ্জন

দেশের ভাটা দেশের ভাটা
তোমার পায়ে নমস্কার !
দেশের ভাই প্রাণটা দিলে
এই যে তোমার প্রস্তাব !

জন্ম দেড় ভাই দেড়
শান্তি দেড় আপনার,
আগ দেড় স্বার্থ দেড়
দেড় জানন-অনা-ভাব ;

দিতেই তুমি জান্মাচ্ছিলে
কলির দাতাকণ তে !
প্রতিদান ত চাহিলে না
প্রাণটা ছিল পূর্ণ বে !

৪

পতিতেরি বন্ধু ছিল
 আত্মাভোগ মহাপ্রাণ !
 দৃঢ় তাদের বস্তেল বুকে—
 সেই যে ছিল ধান-জ্ঞন !

৫

বঙ্গনারীর অভ্যন্তরে
 কেঁদেছিল তোমার প্রাণ,
 জ্ঞানের আলো হালিয়ে দিতে
 যা কিছু সব কল্পে দান !

৬

‘নারী-কর্ম্ম-অনিদর্শ’
 ছিল প্রধান বাদিক !
 প্রতিজ্ঞাতে ভাস্য ছিলে
 অটল দৃঢ় নিষ্ঠীক !

৭

তোমার স্মৃতির পানে চাহি’
 বহে চক্ষে অশ্রু-ধার ;
 দৰ্শনে থাকি লহ আজি
 দীনার ক্ষণ শ্রুতা তার !
 শ্রীরেণুকাবালা মুখোপাধ্যায়



শোকেচ্ছাস

কোথা গেল বল আজি সেই প্রিয় ফুল,
মাত্রের কুবাস মৃদু দন্তবাসিকল ।
চিত্তের রঞ্জন আত্ম সে চিত্তরঞ্জন !
আঁধারিয়া চিত্ত-ভূমি কোথায় এখন ?

কে হেন নিদুর চোর ভরিল সে নিধি,
হাত রে মেছের প্রিয় বাম দড়ি বিধি ।
তে আবাঢ় ! কুমিল্ল মে ফেল নেতৃ-জল,
মাত্র লাগি ঘোরা কাঁদি উঠয়া বিশ্বল ।

৫. জগন্নাথ প্রিয়মনে ক্ষণ দরশন,
নৌকুরের শোভা কাঁচি রেখ সন্দেশণ ।
৬/ দেশবাক্তব্য কুমি দেশবিহু তরে,
কুন্দমিলে অনুভূতি দন্ত-উত্তোল ।

জগন্নাথ কুন্দমিলে দুর্বিহু আর,
সন্দেশ কাঁচের বাগ চৰে কাঁচার ?
আদমা উৎসাহভূতা প্রকৃত আনুষ,
নবীন যুবক সম কানোচি উৎপন্ন ।

কি ছাই সাজাজা-পর্ণ লাভ মে কি মান !
চোমার অঙ্গুয়া-কাঁচি রাত দাক্ষুণ্যান ।

তে রাজষি ! বঙ্গহৃদে তুমি অধীশ্বর,
বন্ধুল বসন তব স্বদেশী খন্দর ।

বঙ্গের পরিত্র ধূলি বিভূতি সমান,
দেশবাসী প্রতি তব আত্-সম জ্ঞান ।
স্বার্থতাগ মহামন্ত্র করেছ সাধন,
স্বদেশ-মঙ্গলে তাজি নশর জীবন,
দিয়াচ শুর্ণাতিপূর্ণ দৃঢ় অস্তি তব,
যাহাতে গঠিত বঙ্গ হবে অভিনব ।

শ্রীপদ্মলোচন ভট্টাচার্য কবিশঙ্ক, (নারিট)

চিত্ত-শোকে

ভেঙ্গে গেছে হন্দি-বাণী, আর কি তুলিবে তান,
 চারদিকে ধাক্কালাটা ভারত-গগন ঝান।
 স্বর্গস্থুল পরিষরি ঘৰতে ঘৰতি ধরি—
 ভারত-চিরন্তন বাঞ্ছাণী জাওয়ে মান।
 দেশসেবা-চরকমূলে, মন-মান সমর্পিলে,
 ভিখারী সাজিয়ে পারে তাজিলে আপন প্রাণ,
 সেই) অপূর্ব ক্ষাগেরি ধারা বুবিয়েও নারিন্দু মোরা
 অভিমানে বিভু-পদে লভিলে চরম স্থান।

শ্রীঅতুলানন্দ বক্সৌ

ଦେଶ-ଚିତ୍ର

ଚିତ୍ରେର ରଙ୍ଗନ ଲାଗି ଜନମ ତୋମାର ;
 ଲକ୍ଷ କୋଟି ଚିତ୍ର ତବେ କରି ଅନ୍ଧକାର,
 କୋଥାଯ ଲୁକାଲେ ବନ୍ଧୁ ? ଦେଶବନ୍ଧୁ ତୁମି !
 ତୋମାର ଅଭାବେ କାହେ ତବ ଜନ୍ମଭୂମି !
 ଯେଦିନ ପ୍ରଗମ ତୁମି କାନ୍ଦାଲେର ବେଶେ—
 ଦୈତ୍ୟେର ସ୍ଵରୂପ ସାଜି ଫେର ଦେଶେ ଦେଶେ ;
 ମନେ ହ'ଲ, ଓହେ ବୁଝି ନଦୀଯାର ଗୁରୁ,
 ଆବାର ଲୀଲାର ଛଳେ—ଲୀଲା କରେ ଶୁରୁ !
 ଦରିଦ୍ରେ ସେବିଲେ ତୁମି ନାରାୟଣ ଖାନେ—
 ଦରିଦ୍ର ତାଇ ତୋ ତୋମା ନାରାୟଣ ଜ୍ଞାନେ !
 ଯେଥାଯ ବାସନା ତବ, ମେଥା ତୁମି ଯାଓ—
 ନିଖିଲ ପ୍ରଣତି, ପଦେ—ନିତି ନିତି ପାଞ୍ଜ !
 ସର୍ବେଶ-ଆଶିସ୍ ଧରି ମୁକୁଟେର ପ୍ରାୟ,
 ଆବାର ଜନମ ନିଃସାଙ୍ଗାର ପ୍ରାୟ !

ମହାରାଜ-କୁମାର ଶ୍ରୀଷ୍ଠୋଗୀଜ୍ଞନାଥ ରାଜ୍

অর্ধা

হায়, চির-ভোলা শিমালয় হ'তে
 অমৃত আনিতে গিয়া,
 ফিরিয়া এলে যে নালকণের
 ঘৃণা গরল পিয়া ।
 কেন এত ভাবাবসেচিলে তুমি
 এই ধরণীর দুলি,
 দেবতার তাঁর দামামা বাজায়ে,
 দার্গ লাউল তুলি ।
 ধরি আর তোমা ধরিতে পারে না,
 আজ তুমি দেবতার,
 নিয়া যাও দেন মন-ভগ্নার
 অনা নয়নসার ।

কাজী ইজকুল ইসলাম

দেশবন্ধু

চিনিবে কি দেশ-বন্ধু তোমা বঙ্গজনে ?
 ছিলে কি মহার্হ রঞ্জ তুমি এ ভারতে !
 এ কোন্ অমৃত-ফল কল্পের কাননে,
 কোন্ সাধনার মহাশক্তি এ জগতে !
 আচরিলে কোন্ ব্রত কোন্ জন্মান্তরে,
 এ মর্ত্যে করিলে যার মহা উদ্যাপন ;
 যার সমুজ্জল জোতিঃ যুগ-যুগান্তরে,
 বিশ্বয়ে বিমুক্ত হ'য়ে নিরথে ভূবন ।
 কে ছিল তোমার সম বিপুল মহান्,
 দরিদ্র-দেশের বন্ধু ! বিশ্বে কি অতল,
 দেশ-হিতে সর্বত্যাগ—মহা আত্মান
 দারুণ দুর্দিনে চির-অকূলের কূল !
 সমগ্র দেশের দীপ্তি গিয়াছে নিবিয়া,
 বহে কি শোকের বন্ধা ধরণ্ডা প্লাবিয়া !


আনন্দেন্দুনাথ সোম, কবিত্বসম, কবিশেখর



ଏହିଥାନେ ମେଘଦୂତ ଲେଖନ କରା ହେଲା ଶିଳ୍ପୀ

642-001

b2



চিন্তিতা।

১

অরুণ্ডদ কি যে বাথা মোরে আজ করে দেয় মক
বক্ষ রাখে অশ্রু চাপি, রহি তাই বন্দন-বিমুখ ।
ভাষা নাহি খুঁজে পাই, ভাব যায় তারাইয়া শোকে,
মুখৰে নীরব দেখি, কত কথা বলে' যায় লোকে ।

২

গৌরবের গৌরীশৃঙ্গ আশুতোষ পাড়ে যবে ধৰ্মসি,
কতি নাই কোনো কথা, মৃহূমান একা ছিলু বসি ।
ভাবরাজো ভূকম্পন গুণ্ঠরণ দেয় ভোলাইয়া,
শোকের মেশুর্মী বয়, মানসের তল ঘোলাইয়া ।

৩

আজিকে আবার সেই সম্মুখেতে শোকের পাথার,
কানের অশনিপাতে হৈমগিরি তল চুরমার ।
অহিংসার বোধিকৰ্ম, তাগের নীরব নিরঙ্গনা,
সম্মুখে শুকায়ে গেল চক্ষে মোর নাহি অশ্রুকণা ।

৪

উর্জস্বল জোতিরাজা নয়ন ঝলসি দেয় মোর,
দেখিতে পাইনা ভায়া, উড়ে মরি বিহগ ফঁফর ।
চঞ্চল প্রাবন যেন দশ দিক্ দেয় মগ্ন করি,
বক্ষের মৃণাল ভাঙ্গে শতদল উঠে না মঞ্জরি ।

৫

বিন্দহারা ‘চিত’ সে যে বিধাতার অপার্থিব দান,
ফাস্তুনীর সৌম্য দেহে দধীচির ধ্যানমগ্ন প্রাণ।
তারে গড়েছিল বিধি মিশাইয়া অমৃত বিদ্যুতে
মণিকর্ণিকার ঘাট—জীব শিব, জীবনে মৃত্যুতে।

৬

‘মালঞ্চ’ বলসি’ গেল, থেমে গেল ‘সাগরসঙ্গাত’,
গান্ডীবী মূর্চ্ছিত রথে এ কাহার করাল ঈঙ্গিত ?
যায় নীলচক্র দেখা, রথের যে দেরী নাই, আর.
অনন্ত পথের যাত্রা কোথা তুমি ? ডাকি বারবার।

৭

তুমি কবি, তুমি ধ্যানী, দৃষ্টি তব সৃষ্টি পারে যায়,
বর্তমান সাঁতারিয়া ভবিষ্যের স্মরেন ছায়ায়।
তুমি গরুড়ের মত চিরদিন অমৃতসন্ধানী,
হৃদয় কৌপীন পরা, দীনতা-কৌলিন্যে অভিমানী।

তোমার উদার বক্ষে মিশেছিল হিন্দু মুসল্মানে
দেখা দিত আকবর প্রতাপ ও জয়মল সনে।
অসি আর বাঁশী তুমি মিলাইলে পরাইয়া রাখী,
না দেখি ইদের চাঁদ, হে ফকির, তুমি দিলে ফাঁকি !

তোমার যা কিছু ছিল সব তুমি তাজেছিলে তাগা,
 দেশবন্ধু সর্ববহারা নিঃস্ব তুমি স্বদেশের লাগি ।
 ছিল শুধু স্নিগ্ধ শান্ত, ভীমকান্ত প্রাণটুকু পুঁজি
 ‘বিশ্বজিতে’ পূর্ণাঙ্গতি তাও আজ দিয়ে গেলে বুঝি !

১০

বিশ্বাসী বৈষ্ণব তুমি, বংশীরব দংশিয়াচে কাণে,
 প্রেমের শ্রীবৃন্দাবনে চলিয়াছ কাহার সঙ্কানে ?
 ভৌতির শৃঙ্খল ভাঙ্গে, ভাঙ্গে যে কংসের কারাগার,
 সে আজ দিয়েছে ডাক, মৃত্তা—কি মিলন অভিসার !

শ্রীকৃষ্ণদ্বন্দ্বন মণিক

দেশবন্ধু-কথা

শ্রীকাঞ্জলি

শুশানেতে সব শেন ?—সেত মিথা ভয়,
শুশানেরি না মানি' শাসন,
ভাবুরণে জীবনের নিত্য পরাজয় ?
মরণের না মানি' বারণ,
যুগে যুগে দেশে দেশে তে আমর ! আয়ান ! অঙ্গয় !
গাও স্বাধীনতা গান, গাও তুমি জীবনের জয় !
গাও তুমি গাঁচি-চিরক্ষন
দেশবন্ধু তে চিরক্ষন !

ভাবা নিল পদপলি ভূগ সম এসে ;
অনন্তের বিশ্বাম মন্দিরে
আন্ত দেখানি নিল বিস্তৃতির দেশে ;
সে আন্ত 'চির' হেগা ফিরে ।

সঞ্চারে সে উন্মাদনা আহ্বা মানো অশৌরা বেশে,
সর্বত্ত্বাগী সে তাপস দেশ-জনন্মারে ভালোবেসে,
সে অন্ত দেহমুক্ত মন ;
দেশপ্রেমী তে চিরক্ষন ।

লক্ষ দেশবাসী বুকে তুমি নববল
জীবনের তুমি যে জীবন,
ভাগুরত তে আদর্শ পুণা সমুজ্জল !
ভয়হীন জলন্ত ঘোবন !

অজুর অমুর তৃষ্ণি ! পুণ্য স্মৃতি পাখের সম্মল
নির্বেদিলে দেশ-মায়ে জাবনের রক্তজবাদল
প্রণয়িচে তব ভক্তগণ,
দেশপূজা হে চিরেঙ্গন

দেশ-আত্মা-দেহ পরে চিতা শোমশিখ
পুণ্য আশ্চি নিভিবে না কড়.
ক্ষুদ্র স্বার্থ ভস্তা হয়, যার অঙ্গিকা
জড়ে প্রাণ জেগে ওঠে তব।

দেশ-মাতা তব ভাবে একে দিল জোটিশ্বর ঢাকা,
ভাবতের উচিত্তাসে রাবে নাম স্মণাফরে লিখা।

দেশবাসী করিব বন্দন ;
মুচ্ছাঙ্গন্তি হে চিরেঙ্গন !

শ্রীমতীশচন্দ্ৰ রায়

ଦେଶବନ୍ଧୁ-ବିଯୋଗେ

ନାଟି ସେ ମରମୀ କବି ମୁକ୍ତିକାମ ଧ୍ୟାନୀ,
 ପୂଜିତ ଯେ ସର୍ବଜୀବେ ନାରାୟଣ ମାନି’
 ନାତି ସେଇ ଦାତାକର୍ଣ,—ଶୈମ ଶ୍ଵାସ ତାର
 ମିଶେଚେ ହିମାଦ୍ରି-ଅଙ୍କେ,—ରଙ୍ଗ ହାହାକାର
 ତିଷ୍ଠାର ତୁରନ୍ତ ଶ୍ରୋତେ ଭେସେ ଆସେ ହାୟ,
 ମହା ଦେଶ ବ୍ୟଥା-ବରା ଆସାନ୍ତ ଧାରାଯ !

ନବୀନ ଦଧୀଚି ଯାଓ ଜୟମାଲା ଗଲେ,
 ଦୌଷ୍ଟ ତବ ଲଲାଟିକା ଯଜ୍ଞ ହୋମାନଲେ ;
 ଭେଦବୁଦ୍ଧି ପରିହରି’ ନିଖିଲ ଭାରତେ
 ତୁଳିଯାଇ ଜୟଧବଜା ଏକତାର ପଥେ ।

କେ ହୁୟେଛେ ସର୍ବତ୍ୟାଗୀ ତୋମାର ସମାନ ?
 ଦେଶବନ୍ଧୁ, ସତାତ୍ରତ, ହେ ଦିବା ସନ୍ତାନ !
 ମୃତ୍ୟୁଜୟୀ ଆଜି ତୁମ ହେ ମୁକ୍ତ ବୈଷ୍ଣବ,
 ଲହ ଏ ଭକ୍ତେର ଅଧ୍ୟା ହେ ମହାମାନବ ।

ଆକର୍ଣ୍ଣାନିଧାନ ବନ୍ଦ୍ୟାପାଥୀ

শোকাশ্র

নাহি 'সাগরের সঙ্গাত' আৱ
 'মালধ' আজ স্তুরভিত্তান ;
 'কিশোৱ-কিশোৱা' লুটায় ভূমিতে
 কোথা সে কবিৱ আনন্দ-দীণ ।

নৱ-নারায়ণে নিয়েছে গোপনে
 দেৱ-নারায়ণ বুকেতে ধৰে,
 বৰষার মেঘে ভুনন ভৱিয়া
 সে আজি আমৱা উজল কৱে ।

কোগায় দেশেৱ দৰদী বস্তু,
 কোগা মমতাৱ প্ৰস্তুবণ ;
 সোনাৱ কাঠিৱ জ্বায়ন-পৱশে
 কে আৱ জাগায়ে তৃলিখে মন !

স্বৰ্গলোকেৱ নব জোাতিস,
 হে আলোকপুঞ্জ মুক্তপ্রাণ ;
 আজি শোকাশ্র মন্দালোকেৱ
 লত অশ্রুৱ শৰ্কা দান ।

শ্ৰীপতি প্ৰসৱ ঘোষ

ମହାପ୍ରୟାଣ

ଏନେହିଲେ ସାଥେ କରେ
 ମୃତ୍ୟୁହୀନ ପ୍ରାଣ,
 ମରଣେ ତାହାଇ ତୁମି
 କରି ଗେଲେ ଦାନ

ଶ୍ରୀରବୀଜ୍ଞନାଥ ଠାକୁର
 ।

